

四庫全書

史部

欽定四庫全書

史部

江南通志卷六十三

詳校官給事中臣丁雲錦

檢討<sub>臣</sub>德生覆勘

總校官編修<sub>臣</sub>王燕緒

校對官助教<sub>臣</sub>蔡鎮

謄錄監生<sub>臣</sub>胡曉春

欽定四庫全書

江南通志卷六十三

河渠志

水利治績一

江蘇二府

江寧府

前詳各府州水利此詳治績故重列府州分見焉

三國吳赤烏中使校尉陳勲發兵三萬鑿句容中道

至雲陽西城號破岡瀆

築青山湖立盤石為疏閉之節

南北朝宋明帝時使沈瑀築赤山塘

陳高祖時修復破岡瀆

唐麟德中令楊延嘉因梁故堤修復赤山塘

大歷十三年令王聽修復赤山塘周百里立二斗門以節旱澇

明成化中知溧水縣熊達疏百丈溝為灌溉之利

弘治初知溧水縣楊榮開濬百丈溝八百丈中存九壩民賴其利

正德三年知高淳縣李岫築三壩因名李壩

嘉靖三十年知江浦縣侯國治築孤塘堤

隆慶三年知高淳縣築鄧壩自石家嘴至花溪長

二十餘里

萬曆七年高淳縣居民戴瑞築均豐壩

十六年高淳縣築橫埂以捍湖水

二十五年知高淳縣丁日近重濬天生橋河道

二十九年知句容縣茅一桂咨訪水利議得高鄉

以地之凸凹為水之盈涸相地置牖謹啓閉時蓄  
洩灌溉之利不勞餘力低鄉自秦淮河以西麻埭  
橋以東相距數里若濬為一河自可直達仍東西  
置牖防其壅涸從中經紀其陂池鱗次其滕隴不  
失前代築堤建二斗門之意上諸臺不報

四十三年南京工部尚書丁賓題准開濬秦淮河道顧  
起元曰江寧自秦淮通舟外惟運瀆與青溪古城  
濠可容舳艫然青溪自淮清橋入至四象橋而阻

運瀆自斗門橋入西至鐵窗櫺東亦至四象橋而  
阻以河身原狹又居民侵占者多易湮塞也頃工  
部開濬青溪運瀆其意甚善然僅城中利搬運耳  
若郊外諸湖湮塞既多秦淮源遠而受水復衆溯  
秦淮之發源一自黃堰壩而東上抵句容之南門  
一自方山東南上抵溧水其諸水相灌注一支繞  
方山東面上抵彭城山一支自張山上溯金陵鎮  
過馬家橋抵橫山一支西抵後乾橋一支西抵陳

墟橋一支自上方門外小河東歷高橋門抵滄波  
門郭內一支自澗子橋南上至天界寺此皆可以  
行舟而為田地侵蝕遂多狹窄且易淤墊伏秋水  
漲處處梗咽蓋溧水溧陽句曲諸水惟一秦淮為  
之尾閘夏秋江潮盛大上壅下泛無支流分洩所  
以近年江寧時苦水而各鄉尤甚正坐此耳若當  
事者肯議挑濬或令傍河有田者計其畝數幫出  
工值委兩縣官分程督濬功成之後不但支流分



派水無泛濫之憂而往來搬運舟航所至省財力

無限關係國計民食者非輕此亟宜講求者東南  
利便書云建康古城向北秦淮既遠其漕運必資

舟楫而濠塹必須水灌注故孫權時引秦淮名運

瀆以入倉城

今斗門橋以北一帶河至鐵窗櫺者是

開潮漕以通江

水

今北門橋至珍珠河一帶是

又開瀆以引後湖此其大畧也

自楊溥夾淮立城

今自通濟門起至石城門皆是

其城之東塹

皆通淮水

今通濟門外至南門一帶是

其西南邊江以為險然

春積雨淮水泛溢城中皆被其害及盛冬水涸河  
流乾淺在今日正與宋無異宋隆興二年張孝祥

知府事奏秦淮流經府治正河自鎮淮

今南門橋

新橋

入江其分派為青溪

今洞神宮後一段經四象橋一帶是

自天津橋

今內橋

出柵塞門

今鐵窗橋

入江宋時水西旱西二門外

未有土也石城下即臨江柵寨門近地屬有力者  
因築斷青溪水口創為花園每久雨水暴至則正  
河不能急洩水勢於是泛濫城內居民被害今古

潮溝青溪運瀆河身皆為居民日久侵占湮塞不通故水患正與此類於今欲復通寨門使青溪徑直入江則城內永無水患及汪澈繼孝祥知府詔澈指定以聞澈言開西園古河道通柵寨門尤便從之戚氏志云秦淮水源甚遠小川流入者甚衆又古來貯水湖衍後世築為圩田甚多每夏雨暴至江潮復湧水即泛濫皆經流域內一河入江自源及委所過不計幾橋凡過一橋皆為水石所堰

束扼及居民築土侵狹河道故水失其常橫流弗  
順是以必資柵寨門河及長干橋下河

今南門外大橋分

洩其勢其關國賦民食者非輕通便舟楫特是小  
事自前如孝祥所言止謂城內被水然多不過數  
日即退其害亦輕觀鄉村圩田始見其害蓋上元江  
寧溧水多圩田每遇水至則舉村合社日夜併力  
守圩狼狽淤泥中如遇大寇幸而雨不連降風不  
湧浪可以苟全其或壞決則水注圩中平陸良田

頃刻變為江湖哭聲滿野拏舟結筏走避他處國  
賦民食兩皆失之是皆水不安流之故耳

國朝雍正十一年江浦縣浚朱家山河道并建牖二座

蘇州府

夏禹貢三江既入震澤底定史記禹抑洪水於吳通

渠三江五湖

周元王元年越大夫范蠡開漕湖

亦名蠡湖

赧王五十二年楚春申君黃歇城故吳墟其城內

北瀆四縱五橫

南北朝梁大通二年詔遣使交州刺史王奕漕大瀆  
唐貞元八年蘇州刺史于頔繕完隄防疏鑿畝澮列  
樹以表道決水以溉田

元和二年觀察使韓臯刺史李素開常熟塘自齊  
門北抵常熟長九十里因名元和塘

後訛稱雲和

附

劉允文記畧

吳之藪曰具區郡之大惟蘇州商為貨  
居農實邦本錫貢多品厥田下下土宜

在民地利乎水常熟塘按圖經云南北之路自城  
而遙百有餘里旁引湖水下通江潮支連派分近

委選輸左右惟强家大族時接壤制動涉千頃年  
登萬箱豈伊沿沂之功實出灌溉之利故名常熟  
歲無皆焉貞元年來大旱填淤薦為塗泥而淪胥  
怨咨殖物痛矣郡守隴西李素聞於本道廉使吏  
部尚書韓公秉文請事疏鑿於是參井邑之役則  
經費工力而長洲三之一焉縣宰李暎復善供命乃  
計工量日候隙庀徒為利涉之宜蔽反壤之害詢蓄  
洩之勢增遠近之防人不告勞事為永逸先期而  
望表繩直不日而終朝子來塘間地中工畢泉出  
山澤作氣江湖發源積為長流實自浙浙舟楫鱗  
集農商景從春秋有施水旱斯備都人士  
以允文在公之宇備詳其事請刻於石

五年蘇州刺史王仲舒隄淞江為路時吳江境南  
北西俱水鄉抵郡無陸路故隄路以達之

太和中疏常熟縣鹽鐵塘

天祐元年吳越王命都水庸田司督撩淺夫疏導  
諸河

宋至道二年知蘇州陳省華議築崑山塘

天禧二年江淮發運副使張綸督知蘇州孫冕疏  
五湖及諸港浦導太湖水入海復歲租六十萬斛  
乾興元年詔蘇湖秀三州疏導壅淤命發運使發  
鄰郡兵助工



天聖元年蘇州水壞太湖外塘又海旁支渠湮塞  
八月詔轉運使徐奭江淮發運使趙賀董其事自  
市湮以北赤門以南築石隄九十里起橋十有八  
濬積潦自吳江東赴海復良田數千頃

景祐二年范仲淹守鄉郡親至江滸督濬白茆福  
山黃泗許奚三丈浦而苾湮下張七鴉次之利及  
數州復奏言江南圩田蓄洩有備錢氏偏安民間  
米石錢五十文今米石不下一貫其故可揆臣請

每秋降勅轉運使俾轄下吏民各陳農業利病選  
官討論擇其簡易者畀轉運司著為令初除州縣  
吏輒頒一冊屬之此養民之本富國之術也

慶歷二年蘇州通判李禹卿隄太湖

至和二年崑山主簿丘與權等作崑山塘為橋梁

五十二名至和塘

附

丘與權記畧

吳城東閨距崑山縣七十里俗

謂之崑山塘北納陽城湖南吐松江由隄防不立故風波馳突廢民田以豬魚蠶其民病賦日從逋從姦人緣之通鹽賈自利劫行旅吏莫能禁自唐至今三百餘年欲有營作而弗克也有宋皇祐中

發運使許公建言蘇田膏腴常苦水患乞置官司以吹洩之請令舒州通判殿中丞王安石先相示焉朝廷從之王君至訊其鄉人盡得其利害度長繩短順其故道施之圖繪疏入請議如許公朝廷未之行也至和初今太守呂公下車問民疾苦蓋有意於疏導矣明年與權為崑山主簿始陳五利一曰便舟楫二曰闢田疇三曰復租賦四曰止盜賊五曰禁姦商今錢君復言之太守喜其謀之協從得請於監司粵十月甲午治役先設外防以遏上流立橫埭以限之乃自下流浚而決焉畚鍤所至皆於平陸旬有九日而成深五尺廣六十尺用民力一十五萬六千工費民財若干貫米四千六百八十石為橋梁五十二蒔榆柳五萬七千八百其二河植菱蒲芙渠稱是計其入以為修完料民之餘治小虞自嚴村至於鰻鮑溪治新洋江自朱厓至於清港治山塘自山南至東浚渚湮六十

四浦四十四塘六於是陽城諸河若濂皆導而及江田無濇瀦民不病涉是役也自城東走二十里曰任浦崑山治其東長洲治其西以俗名非便更曰至和識年號也

熙寧三年崑山人郊亶上言吳中水利六失六得

具書與圖及治田利害七事有旨令亶與兩浙運

使及本路提舉司相度開治

附

郊亶上水利書畧

天下之利莫大於水田水田之美無過於蘇州然蘇州五縣雖號水田其實崑山之東接於海之岡隴其地東高而西下常熟之北接於江之漲沙其地北高而南下是二處皆謂之高田而崑山岡身之西抵於常州之境常熟之南抵於湖秀之境其地低下皆謂之水田高田常苦旱水田常苦澇但

水田多而高田少水田近於城郭人所見而稅復重高田遠於城郭人所不見而稅復輕此議者所以但知治水而不知治旱也今先取所謂高田者設堰潄水以灌溉之浚其經界溝洫使水周流以浸潤之立岡門以防其壅然後取凡所謂水田者一切罷去其某家湮浜之類循古遺跡或五里七里而為一縱浦又七里或十里而為一橫塘因塘浦之土以為隄岸使塘浦闊深而隄岸高厚雖大水不能入於民田然後擇江之曲者決之則塘浦之水自高於江而江之水亦高於海不須決洩水自湍流吳淞江南北岸水田約一百二十餘里南岸大浦二十七條北岸大浦二十八條淞江北橫塘二條以上塘浦五十七條並當松江之上流皆是闊其塘浦高其隄岸以固田也久不修治遂至隳壞議者不知此塘浦原有大岸固田乃謂古人浚此大浦只欲泄水此不知治田之本也今當浚治

其浦修成隄岸以禦水災不須遠治  
他處塘浦求決積水而田自成矣

### 又治田利害

### 七事畧

一論古人治低田高田之法三論自來議者只知決水

不知治田四論今來以治田為先決水為後五論  
乞循古人遺跡治田六論若先往兩浙相度則議  
論難合七論先詣司農寺陳白則利害易明大槩  
以為環湖地低故常多水沿海地高故常多旱蓋  
古人治水之跡縱則有浦橫則有塘又門堰涇澗  
布列其間總二百六十有餘今欲畧循古人遺法  
七里為一縱浦十里為一橫塘又因出土以為隄  
度用二十萬工水治高田旱治下澤要以三年而  
蘇之田**郊橋**再上水利畧  
至錢氏時有營田司自唐  
畢治矣  
之制旁分其支脈之流不使溫聚以為畎畝之患  
是以錢氏百年間歲多豐稔惟長興中一遭水耳

暨納土後至今其患始劇蓋由端拱中轉運使喬  
維嶽不究隄岸堰牯之制與溝洫畎澮之利惟務  
便於轉漕舟楫一切毀之初則故道猶存尚可尋  
繹今則去古既久莫知其利營田之局又以為閒  
冗而罷廢隄防之法疏決之理無以考據乾興天  
禧間朝廷專遣使者興修水利遠方之人不識三  
吳地勢高下與夫水源來歷及前營田之利皆失  
舊聞受命而來恥於空還不過採愚農道路之言  
以目前之見為長久之策指常熟崑山枕流之地  
為可導諸港而決之江開福山苕涇等十餘浦殊  
不知古人建立隄堰所以防太湖泛溢淹沒腹內  
良田今若就東北諸港決水入江是導湖水經由  
腹內之田瀾漫盈溢然後入海所以浩渺之勢常  
逆行而瀦於蘇之長洲常熟崑山常之宜興武進  
湖之烏程歸安秀之華亭嘉禾民田悉已被害然  
後方及北江東海之港浦又以水勢方出於港溝

復為潮水抑回皆聚於太湖四郡之境積水涵漫  
常不可治此足以驗開東北諸浦為謬論矣昔禹  
治水於吳通三江以洩一湖之水今二江已絕惟  
吳淞一江存焉疏洩之道既隘於昔又為權豪侵  
占種植菰蒲蘆葦又於吳江之南築石塘以障太  
湖東流之勢又於江中多置簷簷致吳江不能吞  
來源之浩瀚日淤月澱下流淺狹一旦積雨諸山  
之水併溢太湖蘇湖常秀之間陂淹浦港悉皆滿  
漫四郡之民惴然有為魚之患雖有中高不易之  
地種已成實頃刻蕩盡嘗按吳淞江改道深廣可  
敵十浦向之積潦尚或壅滯議者但以開數十浦  
為策而不知臨江濱海地勢高仰徒為無益臣今  
究治水之利必先於江寧治九陽江銀林江等五  
堰體勢故跡決於西江潤州治丹陽練湖相視大  
綱尋究函管水道決於北海常州治宜興太湖沙  
子滄及江陰港浦入北海以望亭堰分屬蘇州絕



常州輕廢之患如此則西北之水不入太湖為害  
矣又於蘇州開吳江之南石塘多置橋梁以決太  
湖會於青龍華亭而入海仍開濬吳淞江其他江  
湖風濤為害之處並築石塘及淤彭堰與諸湖漾  
等處尋究昔日涇港自南經北以漸築為岸隄所  
在陂淹築為水堰秀州治華亭海鹽港浦仍體究  
柘湖澱山湖等處凡有民田高壤障過水勢不可  
疏決者並與開通達諸港浦杭州遷長河堰以宣  
歛杭睦等山源決於浙江如此則東南之水不入  
太湖為害矣此所謂旁分其支脈之流不為腹內  
吠畝之患者此也往年治水之說大約有二一則  
導青龍江開三十浦一則使植利戶浚涇浜作圩  
岸是二者各得其一偏今治水若止於導江開浦  
則必無近效若止浚涇作埭則難以禦暴流要當  
合二者之說相為首尾乃盡其善但施行先後自  
有次第耳為今之策莫若先究上源水勢而築吳

浙江兩岸塘堤不惟水不北入於蘇而南亦不入於秀兩州之田乃可墾治今之言治水者不知根源始謂欲去水患須開吳淞江殊不知開吳淞江而不築兩岸隄塘則所導上源之水輻輳而來適為兩州之患蓋江水溢入南北溝浦而不能徑趨於海故也倘效漢唐以來隄塘之法修築吳淞江岸則去水之患已十九矣

六年檢正中書刑房工事沈括言浙西江浦當浚從之乃命括相度浙西水利

元祐六年詔導蘇州諸河

元符三年詔蘇湖秀三州開治浦港溝瀆修壘隄

岸置斗門水堰

崇寧元年置提舉淮浙澳牘司於蘇州濬楊林河

福山塘

政和元年詔蘇湖秀三州治水圍田工費

三年知常熟縣李光濬山塘小山港

宣和四年十二月知崑山縣吳昉濬至和塘

紹興二十四年大理丞周環開常熟福山港白茆

塘

二十八年兩浙轉運副使趙子瀟知平江府蔣燦  
計料開江明年正月興工從常熟東柵至雒浦入  
丁涇開福山塘自丁涇至尚墅橋北注大江分殺水  
勢二月工畢 知平江府陳正同禁圍裏湖田

附

趙子瀟治水方畧

浙西諸州平江最為低下而湖常等州水皆歸於太湖自

太湖以導於淞江自淞江以注於海是太湖者數  
州之水所潴而淞江又太湖之所洩也然以數州  
之水巨浸而獨洩於一淞江宜其勢有所不逮是  
以昔人於常熟之北開二十四浦疏而導之揚子  
江又於崑山之東開一十二浦分而納諸海兩邑  
大浦凡三十有六而民間私下涇港又不可勝數

皆所以決壅滯而防汎溢也後因潮汐往來泥沙積淤舊置開江之卒尋亦廢去北太湖所以湮塞而民田有漂沒之憂也天禧天聖間運使張綸於常熟崑山各開諸浦以導積水景祐間郡守范仲淹親至海浦開浚五河以疏導諸邑之水使東南入於淞江東北入於揚子江與海合相視合開紫切去處常熟縣梅李塘白茆塘崔浦福山浦黃泗浦崑山縣新洋江小虞浦顧浦郭澤塘總計役夫三百三十七萬四千六百工錢三十三萬七千四百貫米一十萬一千五百石有奇崑山四浦工力不多止用本縣食利戶間浚常熟五浦工力浩瀚係與吳長等縣利害相及欲於三縣雇人充當緣平江積水今經兩月未退已妨種麥若不於農隙之際支給錢米雇夫開治恐來歲春雨積水愈甚虧失常賦不便望指揮施行

隆興二年八月詔江浙勢家圍田湮塞流水諸州

守臣按視以聞其平江府委陳彌作相度彌作乃

上言宜先治者十浦并合開圍田一十三處詔令

守臣沈度依狀開決

附

陳彌作水利議畧

常熟之浦二十

有四皆北入於江崑山之浦十有二皆東入於海蓋以太湖居其上流昔人患松江之不能勝受而使衆水徑得其歸者也諸澤之興始於天禧成於崇祐逮政和間稍已湮廢嘗命趙霖浚之僅能復常熟崑山二三浦而罷竊考周官有稻人掌稼下地之法所以瀦水則今之塘湖是也所以瀉水則今之渚浦是也今諸邑之間曰湖曰瀆以累百數而沿江濱海小川改道往往淤滯不特所謂三十

六浦而已。漚之過多而瀉之過少。重以今年淫雨  
汎濫橫溢。非常年比。識者皆知開浦之利。不但今  
日。特以工費甚廣。不敢輕易倡議。今若併舉大役。  
切慮歎歲民無餘力。官無羨儲。反至勞攘輒擇其  
宜先治者。凡十浦而其緩急又半  
之興工之日。仍乞以緩急為先後。

乾道元年沈度陳彌作又言疏濬崑山常熟縣白  
茆等十浦通徹入海。詔從之。知平江府沈介依次  
開濬。

五年增置撩湖軍兵

淳熙元年知府韓彥古與許浦駐劄戚世明開濬

許浦

二年兩浙轉運副使姜誥奏開常熟縣黃泗浦崔  
浦許浦白茆浦濬通波塘置張涇堰牖 水軍都  
統馮湛知平江府陳峴濬治諸涇塘浦

六年發運使魏峻疏至和塘東自夾潮塘西至戴  
墟浦亘四十餘里又立柵三十二以為禁防官出  
錢二萬三千二百緡米二百一十石有奇

嘉定元年知常熟葉凱濬水洋子涇



十年知府趙彥楠疏錦帆涇以達運河兼備農田  
旱潦

淳祐三年知常熟縣張從龍開支塘長四千尋廣  
一丈深倍之用夫六千工

寶祐四年知常熟縣王文雍濬城河開福山塘

咸淳元年命知平江府沈度開決許浦自梅李塘  
雉浦口東開至白蕩橋白茆浦自黃沙港開至支  
塘橋崔浦自丁涇塘開至浦口黃泗浦自十家港

開至奚浦口萬涇浦自界涇開至鴨頭塘下張浦  
自東海泮開至千步涇七鴉浦自梅浦開至李漕  
涇川沙浦自梅泮開至六鶴浦楊林浦自楊林橋  
開至陶家港掘浦自海口開至五聖港

元至元二十四年宣慰朱清諭上戶開浚婁江

三十年詔平江松江等路府修治湖泖河港

大德二年立都水監庸田使司於平江路專一修

築田圍疏河道

至治三年詔開吳淞江澱山湖及諸河渠

天歷二年吳江知州孫伯恭大修石塘

至正七年吳江州達魯噶齊諾海大修石塘壘石  
厚砌高一丈廣四丈四尺長一千八十丈為環洞  
一百三十有六立石亭於南浦亭之南表之曰至  
正石塘建丁亥菴為居守置常稔田嗣修葺

二十年平江路通判郢肅大修崑山州田圍

三十四年張士誠遣呂珍督濬芝塘山涇口塹其

為港長亘九十里

明洪武七年常熟縣開吳浦

九年開至和塘堰壩

二十八年鑿太平河

永樂元年蘇松水患命工部尚書夏原吉偕通政  
趙居任大理寺少卿袁復給事中姚善鑿吳淞江  
浦疏崑山下界浦掣吳淞江水北達婁江又挑嘉  
定西顧浦南引吳淞江水北貫吳塘亦由婁江入

海又濬常熟白茆塘福山塘耿湆導昆承陽城諸湖水入揚子江濬上海范家浜接黃浦引湖泖水入

海

附

夏原吉治水奏

浙西諸郡蘇松最居下流太湖

湖之水散注澱山等湖以入三泖項為浦港湮塞漲溢為害極治之法要在浚滌吳淞諸浦導其壅滯以入海按吳淞江袤二百餘里廣一百五十餘丈西接太湖東通海前代常疏之然當潮汐之衝旋疏旋塞自吳江長橋抵下界浦一百二十餘里水流雖通實多窄淺從浦抵上海南倉浦口一百三十餘里潮汐淤壅已成平陸灔沙浮泥難以施工臣等相視嘉定之劉家港常熟之白茆港皆係大川水流迅急宜浚吳淞南北兩岸安亭等浦引太湖諸水入劉家白茆二港直注江海又松江大

黃浦乃通吳淞要道今下流壅遏難疏旁有范家  
浜至南倉浦口可徑達海宜浚令深闊上接大黃  
浦以達湖泖之水此即禹貢三江入海之跡每歲  
水涸時修築圍岸以禦暴流則事功可成於民為  
便

二年戶部尚書夏原吉導婁江濬千墩浦至和塘  
四年濬常熟福山塘三十六里

十三年崑山縣重濬太平河

宣德七年蘇州知府况鍾言治水詔周忱與鍾治  
之

九年常熟縣知縣郭南濬鹽鐵塘

正統二年郭南濬七浦塘

七年吳中大水秋七月颶風巡撫周忱奏請量留  
官糧府一二十萬石縣五六萬石賑濟并增修低  
圩岸塍濬金山衛獨樹營劉家港白茆塘沿海各  
河

十年常熟縣濬七浦塘

景泰五年夏大水淹浸田禾經久不退侍郎李敏

知府汪潯議當開浚白茆等塘以洩之潯躬往常  
熟相視時久不疏濬壅成隄堰近民耄倪皆泣臥  
其上以求免言一開浚則堰下之田亦就浸矣潯  
不許挑濬青墩浦橫瀝塘共五六里以通白茆塘  
鑿開三堰約三四里引水通鮎魚口其海淤塞漫  
生叢葦仍挑去約千餘畝於是水得歸海

天順三年巡撫崔恭檄蘇州知府姚堂松江通判  
洪景德等濬吳淞江蘇州自夏界口過白鶴江至



卞家渡莊家涇松江自大盈浦東至吳淞江巡司  
自新涇至蒲匯塘入江又自曹家溝平地鑿至新  
場又自華涇塘六磊塘鶯脰湖烏泥涇入浦又濬

湖州塘

附

錢溥松江水利記

書云三江既入震澤底定然水至吾松則

又分二道而入海蓋西北窪下則自太湖入澱山  
湖吳淞江入海東北高仰則受杭湖之水達黃浦  
以入海高下既殊旱涇交病然旱為東北受病其  
患小水則西北列郡無所歸洩其患大吳淞江自  
勝國末涇塞迄今逾百年興言修浚非無其人然  
或沮於浮議或憚於鉅費回銷歲月卒莫能舉稍  
遇淫雨即成一壑國賦虧而民艱食矣天順二年  
都憲崔公奉勅巡撫東南首詢水患以淞為尤甚

乃舉府判洪侯景德暨二縣尹楊昕李紋治之侯等相視以為江之故道雖浚必合莫若從新地鑿之方易為而功不壞起自大盈浦東至吳淞江巡司計二萬二千丈又自新涇西南至蒲匯入江計四千丈闊皆一十四丈深皆二丈而低鄉之潦可洩東北則自曹家河平地鑿及新塲計三萬餘丈深闊皆與江同又新華涇塘六磊塘鶯脰湖烏泥涇入浦而高鄉之旱亦免大小連絡無不通貫噫亦勤矣哉用工總三萬五千餘沿江耆老相與鼓舞而言曰茲江之湮為吾民病久矣曩時字人者雖廉得利害而訖無成功寧知食物有通否必待其人耶是役也程工而授計口而食民雖勞而不怨則國本垂永之計孰愈於此哉

溥松人也且職史事故請書之

成化五年吳縣知縣樊瑾准本地民呈請起民夫

重濬九曲港共三千八百五十餘丈

八年吳縣知縣雍泰奉檄築西華石塘雍見採香  
涇廢堰旁糧田數千頃遇旱禾槁泰領民尋源得  
於穹窿山隴阪間蓋由山腰法雨泉流出者上為  
一堰下阪分二道一道東由白馬嶺南流踰趙墓  
折而西一道西下山淩環趙墓復迄而東二流相  
合近採香涇瀦聚成潭仍躬相地宜甃築二道石  
堰堰各置一牐隨水旱啓閉復市山石由馬跡山

西南而東築隄千丈未百日告成湖田藉以種獲  
十年巡撫畢亨與蘇州知府邱霽開吳淞江自夏  
界口至西莊家港崑山嘉定二縣分濬

十一年築常熟縣趙段圩田圍

附

黃體勤趙段築

圩記畧

蘇天下大郡常熟又蘇之大縣也地處下  
游古號澤國趙段一圩又其最下隄創宋

元間久而盡圯無復存者湖田悉為巨浸歲屢不  
秋逋租者日以就困民空其居以徙有司艱於理  
成化乙未春民告於縣縣上其狀於巡撫都憲畢  
公亨巡按御史戴公縉僉為民憂乃調度所征之  
材以倡其邑而謀於治水僉憲吳公瑞曰受朝廷  
特命之嚴寄吳越民事之重綱紀振肅繫焉尚可

隳怠乎授其機宜於郡判何君唐何君曰專農桑  
以牧民民瘼未瘳豈善牧者哉遂責成於縣尹蘭  
君玉君屬父老以諭意衆皆感悟於是財獲於官  
力借於民抑聚斂也伐石於山運土於陸因地利  
也量田授役獲利者倍出其工鄰壤者半焉均徭  
役也較人力多寡以為尋尺驗土築虛實以稽勤  
惰課章程也隄之表延亘數里丈一十有奇用木  
為橛橛之內編以竹甃石為址而高與土等上廣  
八尺而下加三之一固基本也隄之形勢逶迤若  
環帶然其外則種以萑葦茭蘆殺水勢也又懼其  
塞之難潰之易預為設備垂永久也木以萬計竹  
倍差於木石以舟計及二十艘錢穀之需累鉅萬  
有奇工役則五萬三千有奇用雖夥而民不見擾  
也始工於是歲二月二十六日己巳告成於三月  
二十九日丙子功之成何其速哉於是沮洳之鄉  
變為禾稼流徙之民相續而還歲已登而賦無愆

期澤之及何其溥耶夫治水必治於下流趙段之水既治則衆流不勞而治治之施又何其知所先務耶宜民樂之不已而形諸歌歌曰隄之未築田混於湖居者以徙賦者以逋諸歌歌曰隄之未築田徙者以還逋者有年覽嘻長隄屹乎天作伊誰之功臺憲民牧田稼芄芄湖水溶溶百千萬祀澤流窮無

弘治元年帶理水利僉事伍性濬吳淞江中段四十餘里

二年蘇州府通判張旻疏鹽鐵塘

是年修婁江隄

七年徐貫濬吳江縣長橋諸茭蘆之地導太湖水散入澱山陽城昆承等湖開吳淞江並大石趙屯等浦洩澱山湖水由吳淞江以達於海開白茆港並白魚洪鮎魚口等處洩昆承湖水由白茆港以注於江開七浦鹽鐵等塘洩陽城湖水由七丫港以達於海開常州之百瀆洩荆溪之水自西北入

於太湖又設導河夫於沿江

附

徐貫治水奏

竊惟東南

地勢低下水患自古有之永樂初元水復漲溢太宗文皇帝命戶部尚書夏原吉大加疏治方得止

息達今九十餘年各處港浦仍復湮塞為患滋甚  
仰惟皇上軫念地方命臣等會同修浚蓋將極墊  
溺之民於社席之上化魚鱉之區為稻梁之域臣  
等敢不罄竭駑鈍以圖仰副聖意用是夙夜不遑  
寧處相度施工竊見嘉湖常鎮水之上流蘇松水  
之下流上流不浚無以開其源下流不浚無以導  
其歸於是督同委官民人等將蘇州府吳江長橋  
一帶茭蘆之地疏浚深闊導引太湖之水散入澱  
山陽城昆承等湖又開吳淞江并大石趙屯等浦  
洩澱山湖水由吳淞江以達於海開白茆港并白  
魚洪鮎魚口等處洩昆承湖水以注於江又開七  
浦鹽鐵等塘洩陽城湖水以達於海下流疏通不  
復壅塞間湖州之婁涇洩天目諸山之水自西南  
入於太湖開常州之百瀆洩荆溪之水自西北入  
於太湖又開各斗門以洩運河之水由江陰以入  
江上流疏通不復湮滯自弘治七年十一月十七



日興工八年二月十五日工畢幸今天氣晴和人無疫癘凡百衆庶爭先效勞即今水患消弭人無墊溺之憂田有豐稔之望列郡士民莫不慶忭是非臣等之能事皆國家盛德大福廣被東南之所致也今將修築過港瀆畫圖貼說謹具奏聞

九年工部主事姚文灝築沙湖隄廣三丈袤三百六十丈是年濬白茆塘福山塘

十年姚文灝濬至和塘委蘇州府通判崑山知縣募工開濬東自新洋江口起西至九里橋凡長四千九百六十五丈用人夫九萬六千五百工計工

授直用錢一百三十五萬

濬七鴉浦籍崑山常熟兩縣近浦之戶二萬二千三百人疏自尤涇東至木樨灣凡五千五百九十大半月成功計工銀五千二百七十兩

開白茆海口

附楊循吉記畧

弘治四年五年七年本府連遭大水民以

匱告工科左給事中葉紳請濬河水入海要道乃以工部左侍郎徐貫與巡撫副都御史何鑑同董厥功以其年十月有事於白茆是港也在常熟東南輸昆承湖陽城湖而注之海往時水由是行其闊六十丈長亘九十里通潮往來吐洩湖泖張士誠設爬沙之夫歲加疏濬以為常永樂中尚書夏

原古治水時相度地勢於湖水交會之衝慮水獨從七浦入海因作斜堰障之分其流注於白茆欲俾地方各沾其利天順中潮沙日漲港漸狹小其後又有引之獨出七浦而決壞斜堰者於是水遂改道更無流波衝洗潮泥而漲沙日甚一日隱然成隄矣乃以五萬九千人專事其役東起海口西抵支塘凡長六千五百五十五丈相傳開治港面闊五十六丈深一丈七尺而以土積岸之兩旁又崇明出巨艦相聯內向爬去壅沙棄於海中俟其沽動仍決壩放水衝之一時因白茆而濬者其上為鮑魚口傳導湖水來脉有新開河龍潭洪白魚洪落星港四支濬之總計六千四百丈凡用萬七千六百人而尤湮長九里鹽鐵塘長十八里皆通白茆凡用萬四千九百人其他不因白茆而別治者七浦與吳江水口而已七浦長四十里徑通海時有湮塞凡用萬七千人吳江水口在長橋外橋

長二里有七十二洞其外匯為大沼廣千畝太湖之咽喉也久為蘆荻所礙已成淤澱凡用萬六千人三閱月皆以成告蓋以鮎魚口為白茆上流斜堰為七浦上流而長橋為諸水上流其在蘇州一府施工如此議者猶以為當時大役莫如白茆所恨輟事太急未獲成效已而岸果頽圯復為潮沙凝積塞而不通於是常熟縣知縣楊子器以為難自迂曲水不能洩致使橫沙欄接海口施工為難又看得湖漕上接芝塘其長不過三十里徑自入海况又河形現存雖則淺狹水亦通流因請於水利郎中傅潮乞濬之議方行子器被召入而郎中臧麟來管水事首理故贖銳意修舉乃檄通判陳暉署縣事同知何宗理視狀皆言本漕視白茆誠為徑直但緣兩旁各居民廬墓必須拆卸方可即工然理實應開而工程浩大計當用夫三萬鱗因其利便以奏詔行巡撫都御史彭禮巡按御史馮

允中會勘應否定奪於時知府林世遠以十六年四月親詣本處相勘得前項港漕俱自芝塘分流但港曲漕直以此微有遠近然漕形闊不過三丈深不過數尺設以此擬開闊十丈兩畔田地各占三丈五尺濬深八尺所起之土占壓田地尤難預計况有民廬墳塚在上關係事重不如仍開白茆為便惟海口壅沙則有馬草洪五里許濬此可為曲避之計及將本港迤西一帶至白魚洪等處但遇乾淺俱各挑深水行勢達壅塞自除

十一年提督水利工部郎中傅潮濬常熟許浦梅李二塘從知縣楊子器議委縣丞趙祥董役三閱月訖工

濬至和塘並立崑山等縣斗門

十二年傳潮重督長洲縣興築沙湖隄

附

吳寬記

畧

郡城東二十里曰沙湖凡太倉崑山嘉定崇明之人之所必經者其廣袤各數十里橫絕道上

其北多腴田其中多舟楫旁有盜藪以行劫為業  
客舟為風波所阻集於岸下多不能免昔人欲築  
隄以捍水者久矣皆謂土石所施無所附麗其功  
難成遂置之弘治丙辰工部主事姚君文灝奉勅  
來督水利始白於巡撫右副都御史朱公瑄謂隄  
可築公往視之亦曰可築且曰是宜用卷埽法蓋  
吾治河決時所已試者也謀既協姚君乃專任其  
事先是公從工部侍郎徐公貫濬常熟江口獲葦  
利之占於民者充公用及是遂賴其濟一時夫卒  
盡力財用畢具功垂成而君移疾去矣今郎中傅

君潮來代周行田野水利大興他日行至沙湖歎  
曰是隄之功其可已乎至是巡撫左副都御史彭  
公禮復勸相之而隄竟以完告其間為丈三長為  
丈三百六十隱然如城堅壯可久安流成渠人皆  
稱便蓋耕者無浸淫之苦則安於田畝行者無覆  
溺之憂則樂於道路賈者無掠奪之恐則保其貨  
利是役也前守為史侯簡今為曹侯鳳皆經畫其  
事者若通判陳暉知縣劉珂鄺璫主簿喻秉則勞  
績並著皆可書者於是傳君使來請文刻石予郡  
人也喜水患之能去且知君才操與姚君並美無  
忝於上命也  
遂為之記

正德十六年巡撫李克嗣分督工部郎中林文沛  
發民夫起常熟縣東倉至雙廟濬白茆故道一萬

三千八百二十丈又親至支塘詢士民開出水口  
議論不一克嗣與蘇州知府徐讚擬循故河疏治  
常熟縣主簿余浪獨主鑿新河不敢發言適巡按  
御史馬錄來會議浪於道中陳白錄具告克嗣相  
度形勢以簿議為是意遂決鑿新河三千五百五  
十丈又濬尚湖昆承陽城等湖支河一十九道凡  
四閱月功成農田得稔時林文沛身親督率暴露  
風日不言勞憊役夫不敢苟且塞責



嘉靖元年工部郎中顏如環檄蘇州知府徐讚松  
江知府孔輔開濬吳淞江自下界口起至龍王廟  
舊江口止又濬趙屯大盈道褐等浦使上流下委

遞相容洩

附

王鏊吳郡治水碑記

今天下財賦多仰東南東南財

賦多出吳郡而吳郡於東南地最下最多水患南方夏秋間最苦多雨蘇湖渺然輒成巨浸故官多逋負民多流殍於是廷臣爭言水利而以吳淞江白茆港為首請設官專治時巡撫應天西蜀李公亢嗣方著若績詔委之進工部尚書得便宜從事復以工部都水郎中林君文沛顏君如環佐之公博訪羣採相度源委謂東南諸水咸匯太湖由三江入海而東江久失故道不可以復尋獨婁江尚

在吳淞江雖在而多涸其別出一支從常熟白茆港入海最大且駛而海沙淤塞久成平陸民且蘆墓其上自成化以來每議開之輒畏其難而止夫太湖吞納衆流猶人之腹白茆吳淞則尾閭也陽城昆承澱泖諸湖猶脈絡也尾閭不洩腹且漲為病四肢百脈悉病矣公乃駐節湖上且行且度度地量功賦役勿淺深計遠邇力取諸近財取諸遠廬舍有次樵爨有所分授以責成時犒以行賞天時晴和法令明一衆心競勸率未明興作入夜未已河上燈檣如星鋪畚如雨謹呼之聲數里不絕不數月工告成初白茆自北達於江河形結屈不可復通乃改就東南挑平陸直注諸海自雙廟至東倉通一萬七千三百九十二丈其深一丈五尺闊三十三丈白茆上流又開尚湖昆承陽城湖各臨為塘為洪為港為涇為濠者凡十有九吳淞江上流頗通利自夏駕浦至舊江口不復容舟因其

舊形廣之深之凡六千三百三十六丈其深一大二尺闊十八丈白茆港口海潮日至沙泥易淤則為石牖一陽城湖水至斜堰分流七浦塘則可少殺白茆之流又為堰一淞勢弱不能蕩激易淤且淤又為石牖一蓋疏宜興湖州諸淤水歸太湖無礙則常之宜興武進湖之烏程歸安松之華亭可無水患淞吳淞白茆之淤太湖之水入江海無礙則蘇之長洲常熟崑山可無水患而吳淞白茆之役最大功費尤多始事於正德十六年十月嘉靖元年四月訖工凡為工四十一萬二千五百三十三銀為兩若干米為石若干費亦大矣保而勿壞則在後之人焉

十七年知常熟縣馮汝弼建各港石牖三大浦連涇渚河向無牖者皆置

隆慶元年巡鹽御史蔚元康濬常熟太倉嘉定三  
州縣境七浦楊林鹽鐵吳塘顧浦青魚涇

二年知常熟縣張博建白茆港石牯

五年巡按御史劉白睿檄蘇州府通判吳宗吉常  
熟縣知縣連三元董濬奚浦長四千四百一十丈  
廣五大深六丈用夫八萬八千九百五十人官給  
銀二千二百三十三兩俱支贖鍰

萬曆五年巡視下江御史林應訓行委水利按察

使馮叔吉檄蘇州府同知王事聖知縣王一言勘  
濬自龐山湖口至長橋達吳家港

六年林應訓行委水利按察使徐節檄同知王事  
聖常熟縣知縣留震臣勘濬自歸家墳小石橋起  
至橫塘止長四十五里面闊十二丈底闊八丈深  
一大二尺

八年常熟縣重濬三丈浦

三十二年常熟縣知縣耿橘濬福山塘

三十三年吳江縣知縣劉時俊築石塘附周道登

吳江縣新築石塘碑記

萬厯三十有三禩五月朔  
邑侯劉公新築石塘成塘

修九萬九千八百一十四尺為橋十有三為竇三十有七南連橋李北接茂苑並葺舊者為里八十有三其石約二而成丈博一尺有八寸九分其博網一以為厚四壘其厚以為塘之崇倍其崇以為基和之用灰支之用木每尺而支者三以石之厚為木之圍三倍其圍以為修水遮深而遮加率一木而為五支薪其木末以當庸直計木五萬九千八百八十六三分之加一以為石之數二分其十加一以為石之工佐者居三之一灰三千有四百石鐵灰索絢直二百五十餘凡費二萬七千金有奇役始於癸卯正月十七日主其議而捐俸以倡者曹中丞也邑二尹西蜀李宗程則督視邑人王

郡倅忠則勛勛沈方伯李文則協議沈寺丞璟沈  
僉憲瓚沈孝廉令名與不佞登則出納父老屠大  
化等十人則宣力凡再閱歲而效其成於公億兆  
謹呼得未曾有薦紳先生構亭鶯湖屬不佞記其  
事夫以塘之積圯歲歲修而圯日甚空為縣官費  
何益公新以巨石為邑永利是大有造於我也且  
不煩官不强民百計拮据杯酒諷勸而事  
忽大集我享其利美哉公績可以頌矣

三十七年常熟縣知縣楊漣築元和塘濬沙浦馬

涇袁張浜

三十九年崑山縣知縣祝耀祖築至和塘

四十年長洲縣知縣胡士容濬練圻塘馬路塘譚

家浜

四十一年胡士容濬走馬塘

四十二年胡士容築至和塘 附 文震孟長洲縣興

築婁江石隄記

蘇固澤國也江淮之水由京口歷毘陵皆從蘇以注海震澤匯宣歙

雪苔之巨浸宣吐於長崑二縣間有婁江實所由道至和塘最當其衝蕩云自宋轉運使喬維嶽決隄為湮水患滋起以迄於今當事者咸鯁鯁慮焉而苦於任事之難至插棘樹版以殺水勢亦幾無謀矣廣濟胡侯士容自嘉定令移劇長洲日延父老問所疾苦而知婁江之塘不可緩也曰是且病涉病溺病飛輓病農農茲土者至累歲不登半菽誰司民牧責可緩諸既又相度土宜而知非石隄



無以障水勢曰是金涇陽城諸湖蕩之所震撼也是太湖沙湖之所騰躍而澎湃也是新洋吳淞諸江之所逆駕也是兩龍涇朱涇蕭涇吳涇陸涇諸要害之所汎而旁齧也苟不為永賴謀僅飾目前又豈司牧者之實意歟於是量工經始里計者四十有五丈計者六十七百橋計者二十有六其巨者一十有八金錢計者萬五千有奇顧邑民苦貧府庫竭莫可調發侯又不能如正統中周夏兩尚書奉璽書從事水利復田租徵發屬邑僅掇導河官帑之羨金不滿千悉捐歲俸與贖錢所入集好義之衆期月而成自長至崑長隄如帶屹然如山於是行者歌於道鼓枹者歌于河農歌于野侯益盡捐祿俸買田三頃其半以屬耆老為永隄計焉

四十三年崑山縣知縣陳祖苞濬至和塘小虞浦

橫塘

崇禎八年巡撫都御史張國維同巡按御史王一  
鶚檄吳江縣知縣章日烱勘核石塘全圯應修一  
千五十五丈半圯二千八十六丈平望西諸家鋪  
水缺應築內外塘七百六十丈並修長橋三江橋  
翁涇橋紳士商民樂助竣工

九年張國維疏導吳江縣長橋缺先是縣民虞燧  
具奏勅部行撫按查核覆題奉旨允行檄下疏濬

橋以至九里石塘通行開鑿

十年張國維同巡按御史路振飛重修至和塘兵  
備馮元颺與知府陳洪謚推官署縣事劉鳴謙各  
捐助有差屬里民馬負圖營辦董成僅四閱月畢  
工

十六年崑山縣知縣楊永言開濬夏界河特舉貢  
生朱集璫董其任集璫分河為四則自龍王廟壩  
口至郭澤塘為一則自郭澤塘至兵墟為一則自

兵墟至葛港為一則自葛港至赤涇口為一則以淤塞淺深為致功難易共開河身四千九百八十二丈調夫分區之主客主區六十畝出一夫客區一百十畝出一夫用夫十二萬一千九百七十四貼役主區每畝錢三十文客區一十六文計得錢每工給八十文又官給錢六十文每工受錢百有四十工始於是年十一月畢於次年四月

國朝順治九年工科給事中胡之駿請濬吳淞以洩陳

澱之水濬劉河以洩巴陽之水奉

旨准行

十一年

恩諭東南財賦重地素稱沃壤連年水旱為災民生重困  
皆因失修水利致悞農功該督撫責成地方官悉心講  
求疏通水利以時蓄洩水旱無虞民安樂利

康熙十年巡撫馬祐奏請開濬吳淞江白茆河

恩准留蘇松常三府漕折銀九萬兩浙省杭嘉湖三府漕

折銀五萬兩充疏濬河工經費督同布政司慕天  
顏檄蘇州府水利同知于階及太倉吳江崑山嘉  
定各州縣官開劉家河淤道二十九里建牯三座  
開吳淞江東至新涇口四十三百五十二丈自新  
涇口迤西至赤雁浦黃渡七千五百丈修復舊址

牯壩

附

馬祐請浚劉河吳淞江疏

臣看得蘇屬劉河松屬吳淞江

乃走洩太湖之咽喉也修則六府同其利塞則六  
府同其害歷代以來凡遇淤滯俱遣大臣駐劄吳  
中專修水利動支正項錢糧撥充疏濬經費臣稽  
考成書明嘉隆年間吳淞道淤湖水四溢淹沒田

廬民生困苦時有巡撫海瑞條奏疏治因役大費  
繁請留漕米二十萬石久動江浙六府無礙官銀  
俱完工費令各處被災飢民上工就食修復水利  
兼行賑濟水災寧息事功告成刊載典章班班可  
考迄今已及百年潮泥日積故道全淤凡官斯土  
者憚於工程浩大財費無資視為末務因循不舉  
去歲夏月霖雨連旬湖水泛溢禾苗盡淹民居胥  
溺積水三月不消農工廢業人戶流亡總因劉河  
吳淞入海之口淤塞湧聚無從走洩故也臣念  
國課民生關係重大悉心講求博采輿論並以疏  
浚二河為今日第一急務檄藩司委官大勘劉河  
淤道二十九里長五十二百二十丈計用人夫三  
十九萬八千四百十二工連牆二座每座工費千  
金以備水旱蓄洩約共需銀四萬兩吳淞江東至  
新涇口皆成平陸應浚四千三百五十一丈自新  
涇口迤至赤雁口黃渡應浚七千五百餘丈修復

舊址壩肺約共需十萬兩臣再四思維當此水災之後村落飢民逃荒乞食臣與屬官勉力捐俸煮粥不過苟延旦夕萬難餉派民夫舉此大工若欲徒責地方各官設處捐助亦終成畫餅勢不得不

請用正項以濟目前急務仰懇

皇上俯

念江浙六郡為國家財賦重地將康熙九年蘇松常

三府漕折銀九萬兩浙省杭嘉湖三府漕折銀五萬兩留充疏濬河工經費俾各處災荒饑民就近上工趨食是修復水利中兼行救饑之事誠一舉兩利倘蒙

皇

上軫恤災傷動支正項地

又報浚完工疏

臣查劉河自

方幸甚民生幸甚

航船港以達海口該五千一百八十八丈河面闊十一丈底濶六丈六尺深一丈積土四萬四千九百餘方勘原舊河身有尚存一線及淺窪處扣除不用挑工土方外實該挑土三萬三千九百四十方



每方用夫十四工雇募民夫四十七萬五千一百  
六十九工築大壩副壩一十條支港水口築小壩  
一十四條於康熙十年二月二十六日起工至十  
一年五六月內陸續完工吳淞江自黃浦東口起  
至新涇口施家港止計該一萬四百九十一丈挑  
河面闊一十五丈底闊七丈五尺深一丈五尺積  
土一十七萬七千餘方內有原舊江形及低窪之  
處扣除不用挑工土方外實挑土一十三萬一千  
四百三十九方每方用夫一十四工雇募民夫一  
百八十四萬一百五十七工內築大小壩一十六  
條又支港水口築小壩十一條於康熙十年十二  
月初八日起工至十一年四月二十六日完工又  
查劉河原議建牘三座約費工料銀三十兩臣又  
同司道各官覆勘情形若於一處分造三牘恐牘  
單薄不能堅久故於天妃宮地方總造大牘一座  
分別三洞洩水雖工費稍加實可一勞永逸吳淞

江於黃浦口建大牘一座臣又思兩江牘座與內地不同恐牘門被潮往來衝擊未能堅久故各於牘旁四角修築以圖永遠查劉河牘座已於康熙十一年三月內完工吳淞牘座已於康熙十二年正月內完工劉河各項工料共實用銀三萬一千六百八十二兩八錢七分零吳淞江各項工料共實用銀一十一萬一千一百七十九兩一錢二分零此係臣經駁減核實應銷之數復取各官印甘結在案今據該司造冊呈詳前來除冊分送戶工二部查核外相應題報聽部核銷

二十年巡撫慕天顏奏請濬常熟縣白茆港武進  
孟河奉

旨准行開白茆自支塘至海口四十三里濬河七千八百

五十六丈廣十丈深一丈五尺用民夫九十九萬

四千工建牆一座費公帑四萬兩

附

募天顏疏河

救荒議

竊惟三吳治水之功歷稽往績惟使太湖之水導入江海而潮汐亦可上通以時蓄

洩則旱滯無虞自三江湮塞震澤汎濫以田為壑而蘇松常湖杭嘉六郡受患日深上年水患瀰漫四野數百里間不第禾盡無收抑且室廬漂沒流離疾苦不忍繪圖仰荷憲臺軫念民生首飭議浚劉河以通水利憲檄諄諄謂吳淞江出海之處已成平陸修復工繁未可輕議惟有專力劉河為今日第一急著此憲臺為吳淞百萬生民造無疆之福也本司遵行蘇松二府詳加確勘茲據蘇府詳議估計工程請動正賦開工等因又據松江府上海縣詳開吳淞江故道酌請江浙六郡正帑協濟

大工各繪圖形中覆憲臺在案本司載考舊誌披閱新圖按湖水之奔趨而東也一自澱山泖湖從華亭之南折而東北入海者為黃浦一自吳江長橋歷長洲崑山青浦嘉定界至上海合黃浦以入海者為吳淞江一自吳縣鮎魚口北入運河經郡城婁門注流上下雉瀆抵崑山至和塘東合新洋江山太倉歸劉家港入海者為婁江即今劉河也迨吳淞入海之處沙壅茭叢昔夏忠靖公引黃渡以西之水北入劉河是今日劉河之一綫為淞婁二江之尾閘合蘇松諸郡之民命攸關者矣浚之烏可一日緩哉但在蘇則望劉河之深廣而崑太嘉為尤切在松則必圖吳淞之成渠而上青諸邑為尤近兩府所議各就其切己者而言未可為全局之通論也本司規畫再三採訪輿論目前救時之策在急疏劉河將來遠大之謀吳淞亦在所必浚蓋吳淞實太湖洩水之中條其故道較劉河更

閱其地勢較劉河更直江浙六郡同其利議協於  
浙可冀旦夕成功焉但今民窮財盡更際凶災而  
工決難並舉劉河處其易吳淞處其難莫若緩吳  
淞而先事劉河之為便本司細詢紳民父老劉河  
之功固自不小而吳淞亦有不得不次第並浚者  
當日導淞水併入劉河者有崑山之夏駕嘉定之  
顧浦以及鹽鐵新洋諸港浦淞與婁相通今則諸  
港浦盡塞淞自為淞婁自為婁則劉河雖開止洩  
震澤半面之流而匯納於泖澱以奔湧淞江者仍  
未得宣通也若再開蒲匯新漚重浚虬江顧浦費  
力於支河小港何如併力於吳淞乎況從來以工  
役救荒使貧民食力以餬口如范文正公守郡時  
吳中大饑發粟募民諸工畢舉以是公私仰給民  
不遷流皆人於凶歲之後無不共循此意蓋小民  
至困苦中工力必賤且飢寒迫身民多思盜河工  
興而樂燭吞鉅盜賊亦可潛消荒政之施莫此為

大然必須咨商浙省督撫早為區畫將全局會疏  
題明共計兩河工費先開劉河至冬間水涸之  
時旋興吳淞大工本司管窺如是今所急惟在錢  
糧災荒之後籽粒既空不得不請銷正賦但

朝廷方在蠲災詘餉之時又何敢言動帑惟念興水利  
而後有農功有農功而後裕國計若惜一時之費  
不作久遠之圖將來海口泥沙日淤一日必至水  
災洧告蠲賑迭施今合兩工所需約計十四萬金  
較之一歲所蠲未及其半而田工無患國賦常充  
可垂十百年之大利一勞永逸功在斯時考海忠  
介開吳淞之疏留漕十萬石佐以協濟稻穀贖罰  
等不兩月而功成倣其遺謨敢請憲臺俯賜會  
題於蘇松常康熙九年折漕銀內留四萬兩以應  
劉河夫工康熙十年折漕銀內再留五萬兩浙省  
錢糧協濟五萬兩以應吳淞夫工仍比歸仁堤事  
例兩省續開援納捐助請於河工告成之後補此

漕折正項錢糧方行停止即於是月一面擇吉施  
工謹先就劉河工程縷析條議并三江全圖繪呈  
憲覽吳淞工費亦可照例核確此皆憲臺為萬  
年國脈百世民生起見用敢敷陳伏乞採擇 又

### 請浚孟河白茆河疏

江南賦稅甲於天下蘇松常  
鎮課額尤冠於江南凡國用

所出盡藉農田倘水旱失宜必致災稔疊告此廣  
渠資溉之功所以斷不可緩也今夏霖雨連綿河  
流四溢田地存在沈淪廬舍更多漂沒臣疾心疾  
首力督司道府州縣等官多方設法宣洩分頭挽  
救而附近劉淞之太倉嘉定吳江婁上等州縣俱  
藉兩江出瀉旋溢旋消雖告被水幸不重困華亭  
並未告災崑青災亦無幾長洲無錫去兩江稍遠  
東南之水不能驟消西北諸流奔江無路田禾淪  
沒甚多宜興首當高源諸山下流亦賴震澤轉洩  
雖東南一面稍沾劉淞導引之益然較長崑等處

更遠西北全無出水之路故受災倍於他邑若夫常熟武進江陰金壇等縣既與劉淞絕隔惟藉大江匪歸其如本地出水要口在在滄塞遂致積雨成壑臣從權救濟將江常二邑沿江一帶通潮小港馬路築埂之處暫行疏導出口隨於洪水汎濫無歸等事案內

題

報在案此不過救急一時稍平水勢旋即堵塞非久遠之圖也臣前疏請浚白茆港孟瀆河福山港三大浦黃四港申港包港安港西港七丫等處蓋既鑒上年之奇旱預料今夏之大滂從長籌畫實非泛言雖部議未邀即允然關切地方民事豈容緩圖臣再四籌畫先擇其工易而費簡者若七丫一帶業已勸民濬淤沙通崇明之運道福山港三大浦道縣各官詳據里民自願分段疏通再如黃四中包安西等港另行的量緩急多方設法次第興舉外惟是常熟之白茆港係蘇常諸水東北



出江第一要河自明季失修湮塞成陸旱則潮沙不通澇則宣洩無路若此港一通不惟常熟水旱無虞即崑山長洲太倉無錫江陰無不共沾其利又武進之孟瀆河係常鎮諸水歸江要道凡高深西北諸水競趨東南則流注於宜興金壇更轉瀉於丹陽武進惟藉孟河一口出江今亦年久失修河身壅積武進以西丹陽以東宜興金壇以北諸水歸江阻道於是水旱並災人力難施矣此兩河者蓄洩之利等於劉淞淤塞之形亦不亞於劉淞今劉淞疏通蘇松常資其並者甚鉅白茆孟河淤塞蘇常鎮被其害者亦復不小此臣身在地方目擊親切日夜籌畫而不敢忽者也是以分委道員細加察勘茲據副使劉鼎參議祖澤深勘估議詳前來查白茆自常熟支塘起迤東以至海口淤道四十三里共長七千八百五十六丈應浚深闊不等總計人夫九十九萬四千工並議修大陡一座

與夫築壩岸水等項共需費五萬六千兩孟河自武進奔牛鎮之萬緣橋起至孟河城北出江淤道四十八里共長八千五百三十三丈應浚深淺不等總計人夫八十四萬工並議建大壩一座與築壩岸水幫岸等項共需費四萬八千兩二河共需費十萬四千兩據各該道請照劉淞事例先動正帑濟工不惟水利克修見在望賑飢民得以赴工趁食不設賑而民已全活數善備焉

四十八年總督邵穆布巡撫于準奏准開白茆福山二港修白茆舊牆建福山新牆福山開土一萬二千一百五十方白茆開土二萬八千八百方共發帑銀三萬四千九百九十七兩零

雍正五年二月初二日奉

上諭地方水利關係民生最為緊要如江南戶口繁庶宜  
更加修濬時其蓄洩以防旱澇向來屢有條奏之人但  
未經本省督撫奏請朕意亦久欲興修以資農務因海  
塘工程正在營治且水利事關重大必得實心辦事之  
人方有裨益即如目今畿輔水利賴有忠誠任事之怡  
親王始可興此大工不然則亦未敢輕易舉行也我

皇考念切民依周知稼穡因康熙四十六年巡省江浙所

至必細驗水土燥濕高下之宜詳考五穀種植之性躬親講求將附近太湖及通江潮之處條分縷晰特頒諭旨令江浙督撫於蘇松常鎮杭嘉湖地方疏濬河港以資灌溉修建牕座以便啓閉皆動用公帑錢糧不使絲毫出於民力恩至渥也乃當時督撫諸臣不能實心仰體惟以虛文奉行糜費帑金二十餘萬大都飽於官吏之侵漁而無實效深可痛恨朕即位以來事事仰繼

皇考之貽謨永圖民生之遠計本欲俟直隸水利興修之

後令怡親王前往江浙地方相度情形商酌興修之舉  
今巡撫陳時夏特行奏請且稱費用不過十餘萬兩即  
可成功據陳時夏陳奏應是地方不可遲緩之事副都  
統李淑德昔任江南松江府同知諳悉水利事宜曾經  
條奏頗為明晰原任山東巡撫陳世倌年力精壯現在  
閒居著李淑德陳世倌會同陳時夏總河齊蘇勒總督  
孔毓珣悉心踏勘詳加酌議倘齊蘇勒河工緊要不能  
親身前往即行文知會商酌定議具奏凡建立牕座疏

濬河流務期盡除淤塞以杜泛溢之虞廣蓄水泉以收膏澤之益其一應工費俱動用庫帑支給一切工程交與李淑德陳世倌監督辦理並諭吏部將現任部屬及候選部屬府州縣人員內有具呈願往効力者挑選十餘人帶往江南不必另出資財惟令辦理事務交李淑德陳世倌二人酌量委用特諭

本年四月二十六日欽奉

上諭齊蘇勒范時繹陳時夏李淑德陳世倌朕軫念民依

以蘇松地勢稍下特遣大臣會同督撫開濬水道為久  
遠之計太湖之水歸海劉河白茆二河為要必徑直深  
廣令水暢出方能一勞永逸圖志新載二河形勢數十  
里一徑直趨出海無少曲折因年歲久遠海口為潮湮  
塞悉成平陸太倉常熟之紳衿土豪霸佔耕種然報料  
者十無二三私獲重利於己今既開濬疏通務必盡去  
新漲地畝以復故道方是聞背公懷私害衆利己之徒  
有不願者串買地棍報具公呈或請別開支河或請另

開新道其言紛紛不一陳世倌乃但知潔己而不奉公  
之人李淑德亦旗下武員識見淺鄙倘以似是之言或  
惑於聽聞或希圖微利或稍徇情而迂回遷避使積水  
不能暢出數年後仍漸致壅塞則汝等罪不可追矣該  
督撫欽差等當竭力秉公詳勘務為一勞永逸之策倘  
紳衿惡棍生事阻撓爾等指名題叅嚴懲數人則不公  
不法之刁風自息矣爾等若少將就欺隱苟且塞責了  
事異日代人領過之時莫怨未明白曉諭也欽此



本年原任山東巡撫陳世倌請先挑吳淞白茆孟  
瀆德勝九曲河俟完工之日各河以次開濬

六年戶部議覆郎中鄂禮條奏近海諸河並設立  
犁船混江龍以疏積沙

十二年總督趙弘恩 題請普修江南渠港趙弘  
恩疏

題為江南渠港亟宜普修以全水利以廣  
皇仁事竊照江南水利屢蒙

聖諭普加修濬仰見  
聖主軫念民依有加無已如淮揚諸河及通州臨壩現今

興修完備蘇松常鎮之婁江吳淞江白茆徐六涇  
福山塘東河長橋北河萬頃港互流港孟瀆德勝  
新河九曲河紫藤塢劉河七浦河等處通江達海  
大河及海口各牘亦俱蒙

皇上命

發帑金興修完竣又蒙將松江等府沿海石塘土  
塘通行建築商農樂利萬世蒙庥惟民田以內一  
切支港小渠萬派千尋皆承流於大河通聯於潮  
水旱則引潮以灌田苗潞則歸河以消積水關係  
並重其利亦溥祇因港渠既多地更深僻工程碎  
雜費用零星故厯聽民間自為修浚難以一一動  
帑興修無如小民勤惰不一書役需索冒侵年久  
竟成道旁棄舍潮沙漸積淤塞日甚臣經臨蘇松  
常鎮一帶留心察勘在在皆然除華亭縣龍泉等  
九河吳縣穹窿山麓堰牘池塘已經撫臣高其倬  
飭行浚築其餘應修小河港渠甚多必須即為逐  
細疏挖一律深通庶港渠湖河內外暢達旱潞兼

資同收鉅效博採輿情無不樂於興舉查江省歷來私派貼費陋規每縣盈千累萬悉飽蠹棍慫恿以蘇松常鎮四府一年而計即共有數十萬金今清釐酌革民力已得寬舒所有此等港渠以及圩湖涵洞似應即從今冬為始勸民循照舊例按田派工業戶給食佃戶出力逐一興修所開土方運送遠處不得堆積兩岸仍淤河道以無益之陋費為水利之正用明白開導勸督之下百姓諒必踴躍趨事此番大修之後將來歲修易於為力至此項工程查有水利効力部員程夢璫謹慎勤勞實心辦事可以總理相度臣亦加意督察其分任更須多員方能細為查勘逐加勸諭隨勘隨修周流督率以期實濟現任州縣各有刑名錢糧諸務各府同知通判州縣佐雜并試用等官亦各有本任事件及別項緊要工程差委且少熟諳河務者更恐濫差書役需索擾累再四思維惟有倣照河工

投効及前署督臣尹繼善辦理海塘將情愿効力之人

題請赴工之例查明實需工員數目有生長沿河及曾任沿河因公呈悞之員或向隨工員在河料理熟諳河務及熟習風土人員具呈情愿効力者考驗確實留工差委如能勤慎任事工竣題明酌量錄用倘有怠玩即行叅處又蘇松沿河塘路坍塌行旅艱難民田亦少保障或勸民力并修或動公項支應亦須漸次經理行據蘇州布政司白鍾山查案議覆僉同并稱蘇松等屬內有寶山華亭奉賢婁縣金山南匯上海等數縣向例業戶按田每畝捐錢五文以為歲修塘工水利等用各該縣此番大修港渠工程即可於此捐錢項下動用又太倉鎮洋等州縣向例亦有每畝捐錢三文二文不等此次大修并應聽其量為加減湊用募夫挑浚均不必拘業戶給食佃戶出力之例此外各州縣

如有願做此式按畝捐錢者亦應聽民酌量派定  
錢文交縣彙給工員募修庶百姓不必人人赴工  
往返多費而工程又得速竣不致掣肘延誤亦為  
因地制宜之善舉總以民間物力仍歸民生實用  
至部員程夢瑛可以總理其事仍令蘇松常鎮二  
道各於所屬就近協辦稽查工費考察勤惰更為  
有益沿河塘路俟港渠修浚次第料理等情臣覆  
核無異除應用工員俟選定具題另造履歷送部  
外理合一併具疏題請臣謹會

題

江南通志卷六十三

欽定四庫全書

江南通志卷六十四

河渠志

水利治績二 松常鎮三府

松江府

周敬王二十五年吳行人伍員鑿河自長泖接界涇而東盡納惠高彭巷處士漚瀆諸水後人名曰胥

浦

唐開元元年築捍海塘起杭州鹽官抵吳淞江長一百三十里

宋寶元元年兩浙轉運副使葉清臣開松江盤龍匯按續吳郡圖經盤龍匯介華亭崑山之間步其徑纔十里而迴洑迂緩乃四十里江流為之阻遏盛夏大雨則汎溢淪稼穡壞室廬殆無寧歲乾興間屢經疏決未得其要范仲淹守平江嘗經度之未遑興作至是清臣轉漕本路以太湖民田為豪右



據上游而水不得洩建議釀為新渠從滬瀆入海  
道直流速其患遂弭

慶厯元年知華亭縣錢貽範開顧會浦

附

章峴記

畧

浦直縣西北六十里趨青龍鎮南通漕渠下達松江舟楫往來實為衝要自簞山之陽地形中

阜積淤漸與岸等垂三十年至是乃籍新江海隅北亭集賢四鄉之民得役夫三千五百五十人府教以尉孫君專督其役興三月辛酉訖四月己丑始於邑郭終於江澁增深四尺槩廣八大無慮役工十萬二千九百五十畚土平道者不與焉

嘉祐三年轉運使沈立開顧浦

六年轉運使李復圭知崑山縣韓正彥開松江之  
白鶴匯如盤龍之法崇寧中郟亶又浚治之皆為  
民利

紹聖中開大盈顧會二浦浚柘湖新涇下金山小  
官浦悉入於海

崇寧二年提舉浙西常平徐確考禹貢三江之說  
以為太湖東注於海松江正在下流向來潮泥湮  
塞水溢為患請自封家渡古江開洶至大通浦直

徹海口七十四里以常平錢米十八萬三千餘充  
調夫之費因令饑民就食確躬操畚鍤以先之水  
道遂通

大觀元年九月從中書舍人許光凝請命本路監  
司檢按松江故道同發運使屬官疏導積水入海  
三年開吳淞江置牖

宣和元年兩浙提舉常平趙霖濬白鶴匯圍裹華  
亭泖為田

紹興四年鹽官丞王珏開華亭近海河二百餘里

通漕溉田民享其利

十五年通判曹泳重開顧會浦

附

楊烜記畧

紹興甲子

夏大水吳門以東沃壤之區悉為巨浸部使者飭郡邑詢求故道導源決壅以洩水勢於是監州曹公慝覽川原考視高下訪於父老得顧會浦自縣之北門至青龍鎮浦凡六十里南接漕渠而下屬於松江按上流得故牖基僅存敗木是為旱澇潮水蓄洩之限復得廢厯二年修河記於縣圖而知茲河廢興之歲月與夫淺深廣狹之制役徒錢穀之數判然察其惠利之實有在於此矣蓋厯百有六年河久不濬而淪塞淤澱行為平陸遂以狀請於朝籍縣之新江海隅北亭集賢四鄉食利之民

以疏治之官給錢糧而董以縣令簿尉興工自十月二十有六日役三月而河成起青龍浦及於北門分為十部因形勢上下為級十等北門之外增深三尺而下至鎮浦極於一丈而橫廣五大奇底通三尺據上流築兩狹隄因舊基為牖而新之復於河之東開治行道建石梁四十六通諸小涇以分東鄉之渟浸不決旬水落土墳由是韓山東西民田數十頃皆為膏腴役工二十萬用糧以石計七千二百為錢以緡計二萬五千

三十年知華亭縣劉侯修秦山鹽鐵蚌港三堰

乾道二年轉運副使姜詵開通波大港

港即顧會浦置

張涇堰牖

附

許克昌浚河置牖碑

甲申秋八月涇雨害稼明年大

饑上臨朝咨嗟分遣使者結轍於道發廩賦粟以活饑者會有言蘇秀勢最下華亭尤近海十八港皆有堰捍潮可一切決之四湖所潞水宜為斗門以便節減上覽而異之亟命兩浙轉運副使姜詵與令丞行視其宜姜侯既受旨諏訪故老周覽川野盡得其便利以聞曰東南瀕海之地視諸港反高雖有神禹不能導水使上也今宜浚通波大港以為建瓴之勢又即張涇堰傍增埧為高築月河置牕其上謹視水旱以時啓閉則西北積水順流以達於江東南鹹潮自無從入也上稱善即丐以常平之帑贍其役且與守臣鄭聞會其事制許焉則相與庀徒揆日賦材計功既具以授之縣令侍其銓銓成以坭姦說以使人檢程視作勿容苟簡乃浚河自蕺山達青龍江口二十有七里其深可負千斛之舟因其土治高岸護青墩傍今有青墩港故水所敗田數萬畝還為膏腴為牕於邑東

西四十有八里增故土七尺甃巨石兩趾相距常有四尺深十有八板板尺有一寸月河之長三千三百五十有五廣常有六尺凡浚河之工萬有一千二百金工石工木工畚鍤之工伐取運致之工總其數樂七倍於浚河糜錢緡九千三百五十四粟石二千三百有九十凡五十有五而畢蓋斂未嘗及民而民亦若不知有是役也

七年知秀州丘宙修華亭瀕海十八堰遂移新涇堰於運港

九年置監堰官於亭林松江府志華亭東南並海自柘湖湮塞置堰一十八所以禦鹹潮宋政和中

提舉常平官興修水利欲涸亭林湖為田盡決隄  
堰以洩湖水華亭地勢東南並高西北並卑大抵  
自三泖五浦下注於江以入海雖決諸堰湖水不  
可泄鹹水竟入為害於是東南四鄉為斥鹵之地  
民流徙他郡中間州縣官懼其害復故隄堰獨留  
新涇塘以通鹽運海潮晨夕衝突塘口至闊三十  
餘丈鹹水延入蘇湖境上是歲八月邑人右正言  
許克昌力言於朝時密以太博除知秀州奉命行



視與令堵觀議以新涇塘湖勢湍急運港距新涇  
二十里水勢稍緩於是募四縣夫移堰於運港併  
築堰外諸港及運港之兩岸東岸自堰至徐浦塘  
二十四里十七丈西岸自堰至柘湖二十三里上  
闊六尺下闊一丈五尺高六尺明年正月遣御史  
蕭之敏按視還奏詔增密秩復租九年招復流民  
又明年正月遣中使宣諭守臣張元成增築二月  
特設監堰官一員土軍五十人置司顧亭林以防

鹽運私發諸堰後堰外隨潮沙漲牢不可壞二州之田得免鹹潮浸灌之患

十三年修華亭縣新涇塘牐增置招賢港徐浦塘二牐

十五年命浙西提舉常平司開濬華亭縣三十六浦

淳熙二年立庸田司於平江撩漉吳淞江沙泥浚各牐舊河渠瀆及松江之張涇通波南北俞塘鹽

鐵官紹盤龍蒲匪六磊石浦等塘

十三年羅點提舉浙西常平以澱山湖洩諸水道  
戚里豪強占以為田故水壅不洩民田病之奏乞  
開濬有旨命點躬親相視開掘農民聞命歡躍不  
待告諭各裹糧合夫先行掘鑿於是並湖巨浸復  
為良田

元至元初中書省准浙江行省咨任仁發言吳淞江  
淤塞奏立都水監仍於中江中書以聞特命行省

平章徹爾提舉修浚一切便宜經畫以松江故道  
湮塞西自上海縣界東抵嘉定石橋洪迤邐入海

袤三十有八里

附

任仁發水利議答

議者曰吳淞江前時深通

今日何為而塞豈非如海變桑田之說非人力所  
可為者歟答曰東坡有言若要吳淞江不塞吳江  
一縣之民可盡徙他處庶上源寬闊清水力盛泥  
沙自不能積何至有湮塞之患哉歸附後將太湖  
東岸出水去處或釘柵或作堰或築狹處為橋又  
有湖泖港汊又慮私鹽船往來多行塞斷所以清  
水日弱渾潮日盛泥沙日積而吳淞江日就淤塞  
正與東坡所見合若云如海變桑田一付之天則  
聖人手足胼胝盡力溝洫皆虛言也聖人豈欺我  
哉所當盡人力而可為也議者曰錢氏有國百餘

年止長興間一次水災宋南渡百五十餘年止景  
定間一二次水災今或一二年三四年水災頻仍  
其故何也答曰錢氏有國宋南渡全藉蘇湖常秀  
四郡所產以為國計常時盡心經理高田低田各  
有制水之法其間水利當興水害當除合役軍民  
不問繁難合用錢糧不吝浩大必然為之又使名  
卿重臣專董其事豪戶勢家箴言不能亂其耳珍  
貨不能動其心又復七里為一縱浦十里為一橫  
塘田連阡陌位址相接悉為膏腴之產以故二三  
百年之間水災罕見國朝四海一統又居位者未  
知風土所宜視浙西水利與諸處無異任地之高  
下時之水旱所以一二年間水患頻仍也議者曰  
蘇州地勢低下與江水平故曰平江故稱澤國其  
地不可作田今欲築圍亦逆土之性耳答曰晉宋  
以降倉廩所積悉仰給於浙西之水田故曰蘇湖  
熟天下足若謂地勢低下不可作田此誠無稽之

論何以言也浙西之地低於天下而蘇湖又低於浙西澱山湖又低於蘇湖彼中富戶數千家每歲種植菱蘆編釘椿篠圍築硬岸豈非逆土之性何為今日盡成膏壤此明效大驗不可掩也既是澱山最低之處尚可經理為田豈已成之田反不可作田耶議者曰水旱天時非人力所可勝自來討究浙西治水之法終無寸成答曰浙西水利明白易曉何謂無成大抵治之之法有三浚河港必深闊築圍岸必高厚置閘竇必多廣設遇水旱亦不能為害昔范文正公請開水浦議者沮之公力排浮議疏浚積潦數年大稔民受其賜載之方策昭然可考謂之無成可乎議者曰河渠圍岸閘竇三者俱備則水早可無民食可足誠為久遠之計朝廷胡為而廢之答曰國家收附江南三十餘年浙西河港圍岸牘竇無官整治漸致廢壞今若募夫供役必取辦於富戶部夫督役必責成於有司二

者皆非其所樂是以猾吏豪民構扇必沮之而後已朝廷未見日後之利但厭目前之擾所以成事則難壞事則易東坡亦云官吏憚其經營百姓畏其出力所以累行而中輟不能成久遠之利也議者曰行都水監既是有益衙門何衆口一詞皆謂無益而朝議罷之答曰民可使由之不可使知之豪民肆奸又吝供輸之費所以百般阻撓但謂無益以敗乃事殊不知浙西有數等之水極治方畧皆不相同非立專司豈能成功使水監衙門真為無益古之有國者亦廢而不置久矣何為周漢唐宋之世經營水利列之史傳代有其人且若浙西低下之地不須水監即今中原高阜之處安用水監河道司為哉高阜之處水監既不可缺而低下之處乃謂不必置何不智之甚也數年之後河港淺塞水害滋甚有憂民忠國者出必復興修水利

之事彼橫議者豈得終沮之哉議者曰水利固不可不修然今隴西漢唐二渠止責於有司修浚民更不擾浙西水利何不亦責之有司答曰隴西二渠長流水也濬成深渠水自下流治之無難浙西水性不一整治方法亦殊豈可以漢唐二渠例視之哉

又平江等路水利狀

太湖納湖州宣州諸溪之水而南北東江海之岸皆高水積其中勢若盤盂設遇雨滂則環湖低田悉皆湮沒若欲導洩積水在乎時時點檢太湖東北兩岸通江河之道不致淤塞可也蓋環湖低田利在洩潦兼沿江傍海高田亦仗湖流奔注衝散潮沙使江河通利乃可引潮灌溉諸小湖在太湖迤東及北者甚多皆能接洩太湖注江達海數內澱山湖自大盈趙屯等浦以出吳淞江與渾湖相接最近若上源所注不急則潮沙注湖漸成淤澱富家因淤澱圍裹成田由是湖水與諸浦漸遠而



所洩並微若非就湖內圍田多開河渠及時修濬  
諸浦則此湖之塞恐不止於是也又接吳江石塘  
障遏東流之勢致潮沙日漲半為平地此乃太湖  
洩水下吳淞江第一要處古來於隄間多置木橋  
與鑿水洞上則通行下則洩水蓋欲仗其急流衝  
滌潮泥免致水患人不知此或便於行路則塞壩  
湖口或情於巡防則密置椿橛矧以茭蘆魚蘆等  
物障遏必得官司於此處榜示告戒使之咸知利  
害可也

二十八年詔開澱山湖命江淮行省燕仲南同左

司郎中都哩默色督浚治

附

潘應武浚放湖水議

浙西地勢極低米糧豐厚自福山而下有二百八  
十餘里沙岡身以限滄溟岡身之間有港浦一百

五十餘處太湖三萬六千頃受納三江之水溢流而下一路徑下吳淞江二百六十餘里抵海又一路自急流港五十里下澱山湖由港浦而入海古人開江浦漣涇漑之類無非為去水計使民居無昏墊而土可耕種居民常常修築圍塍官府常常修浚水路澇則車水出田旱則車水入田公私之利豈不溥哉若公私之力少有不及則民居蕩析而厚利以失錢王時置撩淺軍四部七八千人專事導河築隄宋初廢弛故常有水患至仁宗朝范文正公親歷海濱開浚五浦費米錢一十八萬餘貫石自後置豐田水利使者專管湖塘河渠趙運使任內用錢米四十餘萬至理宗朝創立魏江江灣福山水軍數千人專修江湖塘僅免水患歸附後軍散營廢湖港堙塞其澱山湖中有山寺宋時在水中心東有出水港曰斜漑口曰汊港口曰小漕港曰大漑口曰小漑口各闊十餘丈通潮水

往來潮退即引湖水下大漕大盈等浦入青龍盤  
龍江而出海古人謂之尾閭門宋法禁人占湖為  
田為泲水路故也今山寺在田中雖有港澗悉皆  
淺狹潮水湖水不相往來攔住去水東南風水回  
太湖則長興宜興歸安烏程德清等處汎濫西北  
風水下澱山湖泖則崑山常熟吳江松江等處汎  
濫皆因下流不決積水往來為害去夏大水澱山  
湖太湖四畔良田至今不可耕種昨隨營田司官  
親曾相視水勢與高年老農知識地理人講究得  
澱山湖東大小漕港斜泖等處故是洩水尾閭今  
為權勢占據卒難復舊澱山湖北有道謁浦石浦  
千墩浦小泖口四處取江頗近水勢順便今若先  
於此四處開浚決放水路以救百姓以保公私實  
為居安慮危經理根本之計候水減退然後次第  
開浚諸處河港此古人所  
謂下流既通上流可導也

大德二年春二月中書省奏立浙西都水庸田使  
三品衙門於平江路設置耑一修築圍岸疏濬河  
道務要田農得濟水道流通圍岸堅固為一事浙  
西澱山等湖已有定立官湖界諸人不得似前侵  
占復為民害違者庸田司就便追斷又浙西海水  
晝夜兩潮隨帶沙泥入港漸成壅遏宋時另設撩  
清軍人耑一撩洗今仰庸田司於二八月內依時  
督責如法疏濬無致壅遏與民為害據濬治河道

修理隄岸閘壩合用人工如何措置可以常久通行行省便為從長議擬又浙西官田數多俱係貧難佃戶春首缺食又自行修理官司不為存恤深為未便今後管民官不得將此等佃戶差充里正主首一切等役又澱山練湖諸人占湖為田歲納租糧官司另行收貯若有合行修濬人工物料從庸田司募工支用

八年浙省平章政事楊珠吉達徹爾濬決吳淞江

至治三年詔開吳淞江澱山湖及諸河渠

泰定元年行省左丞多爾濟巴勒知水利前都水少  
監任仁發濬治澱山湖

二年多爾濟巴勒任仁發濬吳淞舊江大盈浦烏泥涇  
三年任仁發置趙浦潘家浜烏泥涇三牯

至順二年江浙行省濬烏泥涇

至正元年修濬吳淞江治渠堰

三年四月都水庸田使司修華亭捍海塘

明永樂二年浚黃浦由范家浜入海

十年濬上海盤龍江

正統八年修浚金山衛獨樹營至劉家港口邊海  
諸河

景泰二年知府葉冕修浚山湖隄湖北界崑山各  
較彼此工莫克就冕一視之督府民修築萬餘丈  
二邑賴之

天順二年巡撫崔恭督工挑浚上海縣自白鶴江

至卞家渡四千六十七丈濬蒲匯塘及新涇四千丈鑿曹家溝南抵新塲二萬丈廣皆十四丈深皆二丈浚六磊塘鶯脰湖烏泥涇沙竹岡諸水通流入浦民感其惠因呼曹家溝為都臺浦

成化八年濬吳淞江

弘治元年帶理水利僉事伍性濬吳淞江中段四十餘里及顧會趙屯都臺諸浦蒲匯楊林新涇諸塘



七年水利侍郎徐貫開吳淞江并大石趙屯等浦洩澱山湖水以達於海

十二年提督水利工部郎中傅潮濬崧子浦檄通判原應宿董役

嘉靖元年工部郎中顏如環濬吳淞江

二年工部郎中林文沛督率華亭縣開南橋塘金匯塘官路港站船浜北蟠龍塘南嵩塘官莊涇青村港黃泥漕尹山涇米市塘共長一萬九千四百

九十五丈上海縣開舊江走馬塘周浦塘站船浜  
鹽海塘六磊塘共長一萬六千五百五十丈以瀉  
當湖三泖澱山湖諸水使各通黃浦吳淞江以入

海

附林文沛請修水利疏畧

浙西天目諸山西來之水皆歸太湖再流入於

陽城昆承澱山三泖等湖其性本皆欲東故神禹  
相地分流疏其東北入海者為婁江東南流者為  
東江并淞江為三江以分洩之自是不聞有水患  
後世近江淤泥之地悉成土田而東江之故道塞  
矣由是欲使東江之水迤邐邇北旋會入淞江而趨  
下之性遲矣故後人於常熟縣北開二十四浦疏  
而導之揚子江又於崑山縣東開一十二浦分而  
納之海所以補東江不通之力也又慮潮沙易淤

各於浦口置立板牘潮來則高之以禦泥沙歲旱亦高之以備灌溉又於牘外或設開江之卒或設撩淺之夫皆所以決壅塞而防汎溢也永樂間尚書夏原吉區畫經度如開劉家白茆二港甚合古人之法弘治七年工部侍郎徐貫奉命斷理其事有通判姚文灝輔之一時疏浚之法亦有次第舊制板牘夫卒之設圍岸之築皆未全備是以諸浦之壅塞如故近年雖有帶管僉事官既不專名亦虛設以至水利日廢乞命廷臣計議勅命專理及今秋收之後訪前代疏浚之規為來年水患之備或計各府錢糧空乏容其借取課鈔支用開諸浦以洩諸湖之水復板牘以嚴啓閉之規立夫卒以繼疏濬之功築圍岸以防橫流之勢雖曰費用浩大然計被災免徵之費孰為多寡從可知矣

四年冬命水利僉事蔡乾浚松江上海張家浜陳

村塘馬家浜舊江青龍江

二十四年巡按御史呂光洵濬艾祈通波以溉青

浦

隆慶三年巡撫海瑞開吳淞江附海瑞疏禹貢稱

入震澤底定三吳水利當濬之使入於海從古而然也婁江東江係入海小道惟吳淞江盡洩太湖之水由黃浦入海年來水道臣曠職不修以致潮泥日積通道填淤雖曰水勢就下而無下可就矣時久潦震蕩太湖因之奔湧四溢滄汜未畝如嘉靖四十年今隆慶三年是也而小為滄沒漂汜之患亦時有之是吳淞江一水國計所需民生攸賴修之舉之不可一日緩也臣於舊歲十二月巡歷

上海縣親行相視按行故道量得淤塞當濬地長  
該一萬四千三百三十七丈二尺原江面闊三十  
丈今議開十五大計該用工銀七萬六千一百二  
兩二錢九分今以水荒缺收飢民動以千百告求  
賑濟臣已計將節年導河夫銀臣本衙門贓罰銀  
兩各倉儲米穀并溧陽縣鄉官太僕寺少卿史際  
義出賑濟穀二萬石率此告濟飢民按工給與銀  
穀於今正月初三日興工挑濬委松江府同知黃  
成樂督率上海縣知縣張嶺嘉定縣知縣邵一本  
分理興工之中兼行賑濟千萬飢民稍安戢矣但  
工程浩大銀兩不敷饑饉頻仍變故叵測官儲民  
積計至二月間盡矣江南四面皆荒湖廣江西有  
收成府縣又執行開糶無從取米伏望皇上軫念  
民飢當恤吳淞江水道國計所關勅下該部酌議  
量留蘇松常三府漕糧二十萬石准照前旨銀數  
改折凡應天等十四府州縣庫貯不拘各院道諸

臣項下無礙贓罰銀兩聽臣調用浙江杭嘉湖三府與蘇松常三府共比太湖之水吳淞江開則六府均蒙其利塞則六府同受其害其庫藏銀亦如應天等處一例取用彼處居民亦聽上工就食吳淞借飢民之力而故道可通民借銀米之需而荒歉有濟一舉兩利地方幸甚

萬曆六年御史林應訓督知府閻邦寧浚大川六支流四十七港浜之小者九十有一求圩岸之故迹盡修築之踰年乃成作水利圩圖

十年松江通判劉師召開濬奉賢黃泥白龍百曲新港白蓮三林走馬虬江等河修築澱泖黃浦等

處隄岸

十六年水利副使許應逵濬吳淞江

二十八年知府許維新開浚府城市河松江府志  
松郡近海潮汐往來泥沙易淤而城市尤甚兼以  
居民侵占河道日隘間有疏治旋即壅塞維新銳  
意興復特委上海縣典史龐尚鴻經理其役凡勢  
家占造水橋河房悉皆撤去東西兩關直河南北  
岸拓復故迹一丈有奇初衆議難之尚鴻不畏強

禦三月而竣河道既通貨艦鱗集衆沾其利至於  
編工計程不役塘長造船運土棄之廢地隨濬而  
畢尤為良法

四十五年上海知縣呂濬開繇府城抵縣内外水  
道

天啓元年華亭知縣章允儒同呂濬濬莘村塘華  
亭長二千三百丈上海長一千丈

二年華亭知縣郭如閻濬官紹塘橫滙河長二千



丈有奇

上海知縣鮑奇謨濬張家塘東自黃浦口起至華亭界長三千二百丈

三年郭如閤復濬府東北城濠二百四十丈

四年郭如閤復濬蒲匯塘徐家浜及城內市河長三千五百餘丈

五年華亭知縣徐尚勲濬海螺港長一千七百八十丈鮑奇謨復濬張家塘長一千一百六十丈尚

勲復濬城濠河涇及集賢涇等河松江府志自萬  
厯間頻遭水患專設導河夫役有司加意修濬每  
歲舉行江河通利

六年青浦縣知縣鄭友元修築田圩松江府志青  
浦自水災後低鄉田畝日窪友元令業主出米佃  
戶輸力分大圩為小圩界長圩為短圩便於庠救  
旁邑傳以為式

崇禎元年蘇松水利道張孝濬華亭莘村蒲匯官

紹等塘長六千四百餘丈濬上海陸道浜莘村塘  
小閘港長四千七百餘丈

二年巡撫曹文衡檄同知錢永澄濬華亭金匯塘  
橫涇河呂河涇徐家浜上海俞塘等河長萬餘丈  
修築黃浦塘岸長二千餘丈是年知府方岳貢濬  
府城內諸河發帑募夫隨運河土增築官塘自西  
馬頭至五里橋長隄高固行旅耕作胥利焉

三年巡撫曹文衡濬上海肇家浜長二千五百餘

丈

四年知府方岳貢濬華亭盤龍塘亭林鶴頸匯河  
運港後港鹽鐵塘南橫港長六千餘丈上海新涇  
長一千八百餘丈

五年巡撫莊祖誨督通判朱啓元濬華亭祝家港  
浙河長三千六百餘丈上海新塲河沈莊河青浦  
蒲匯塘長四千八百餘丈築泖塘澱河岸長二千  
八百餘丈

七年巡撫祁彪佳督濬華亭蒲匯官紹等塘上青  
蒲匯莘村等塘長萬餘丈

八年巡撫都御史張國維督松江知府方岳貢修  
滄闕石塘是時滄闕埧塘長二百八十九丈內患  
口一百十九丈東西兩塘接連患口一百十七丈  
有奇東盡塘五十三丈官給料價工食銀二萬餘  
兩岳貢率屬經始舉人吳嘉印綜覈冒濫石塘以  
成

十三年方岳貢復建捍海石塘舉人何剛董其役  
國朝順治九年巡按御史秦世貞檄華亭知縣劉成龍  
濬春申六磊紫岡沙岡竹岡蟠龍蒲匯諸塘及邱  
涇橫瀝張涇俞塘沈漕涇千步涇并支河二百餘  
條仍令塘長每歲修治

十年知府李正華大濬府城諸河

康熙十年巡撫馬祐奏准開濬吳淞江

雍正五年挑吳淞白茆孟瀆德勝九曲河併各河

次第開濬

九年開濬蘇松常鎮四府河道工竣

已上三條俱詳見太湖

常州府

周泰伯開瀆後人名曰泰伯瀆

漢陽羨令袁玘築長橋鑿便民河

在吳江界

南北朝宋元嘉二十二年修陽湖成良疇數百頃

二十四年治臨津

梁大同元年遼惠山濬溪

今名梁溪

唐景龍二年置將軍堰牖

元和間常州刺史孟簡開泰伯瀆人遂稱為孟瀆

按孟瀆袤四十一里溉田無數附郭思極疏浚孟

瀆疏

孟瀆在武進之北延袤六十餘里外通長江內資灌溉商民舟楫罔不便之嘉靖間築堡中

流日就淤塞嘗有建議開濬旋議旋寢將成平陸臣愚以為孟瀆一開則既有間道以通舟楫而運牖得啓閉之宜又引江湖以達奔牛而運河資接濟之力縱遇亢旱不至坐以待困此緩急可賴之一策也

五代南唐保大元年修孟瀆水門



宋淳化三年知常州王詵開珥瀆

天禧四年知江陰軍崔立濬利港開橫河

慶厯二年知晉陵縣許恢濬申港凡六十八里濬  
澡子港自江口起凡四十里濬戚墅港自湖口起  
凡九十里許工費三十六萬凡灌田萬頃工役三  
月告竣

三年知武進縣楊璵濬孟瀆

是年知常州李餘慶濬顧塘河

嘉祐五年轉運使王純臣督蘇湖常秀四州築田  
塍以禦風濤

六年宜興縣尉阮洪疏四十九瀆洪以吳中水患  
屢上書監司乞開百瀆得請遂疏四十九瀆田禾  
大稔

是年知常州陳襄濬運河襄以太湖積水橫遏運  
河不得入江為民患立法濬之其患遂息

八年知宜興縣司馬旦鑿新溪

是年知江陰軍楊士彥濬橫河

治平四年知宜興縣樓閔濬四十二瀆

熙寧元年樓閔復開一瀆民頌之名樓公瀆

是年歲旱河竭知無錫縣焦千之自小渲車湖入  
運河復車梁溪水由將軍堰以灌之農田獲利

九年知江陰縣楊孝孺督治農田興水利

元祐三年詔浙西常平使者調蘇湖常秀四州民  
夫濬青龍江

六年治芙蓉湖開堰

紹聖二年詔武進丹陽丹徒三縣修沿河隄岸溝

碓

是年詔開濬蘇常二州等處湖浦

元符二年知無錫縣趙伋興濬水利

崇寧元年知常州朱彥濬後河

大觀四年江陰縣丞于溥興水利置黃田蔡涇等

牘導申港利港

政和元年知常州徐申重建黃田牐

三年江陰縣丞楚執柔濬治橫河市墩新河代洪  
港并創馬師唐市牐東門堰

宣和二年兩浙提舉趙霖修平江常州一江四浦  
五十八瀆

建炎元年知武進縣梁汝嘉濬城濠

乾道二年漕臣姜詵知江陰軍徐歲濬申利二港  
造蔡涇牐

六年監進奏院李結獻治田三議詔令胡堅常相  
度以聞諭有田之家各依鄉例出錢米與租佃之

人更相修築從之

附

李結治田三議

蘇湖常秀所產為兩浙之

最自紹興十三年以來屢被水害議者皆歸積水  
不決之故以為積水既去低田自熟第以工役浩  
大事皆中輟臣有管見治田便利三議一曰敦本  
二曰協力三曰因時司農丞鄭亶議云古人治塘  
浦闊深者蓋欲取土以為隄岸非專為決積水若  
隄岸高厚借令大水之年江湖之水高於民田五  
七尺而隄岸尚出於塘浦三五尺則雖大水不能  
入於民田民田既不容水則塘浦之水自高於江  
而江之水亦高於海不須決洩而水自端流矣此  
古人治低田之法也若知決水而不知治田則所

開浚之地不過積土於兩岸之側霖雨滌蕩復入塘浦不五七年填淤如舊前功盡棄為今之務莫若專務治田乞詔監司守令相視蘇湖常秀諸州水田塘浦緊切去處發常平義倉錢米多寡量行借貸與田主之家令就此農隙作堰車水開浚塘浦取土修築兩邊田岸立定丈尺衆戶併力官司督以必成且民間築岸所患無土今既開浚塘浦積土自多而又塘浦闊深易以流洩田岸既成水害自去此臣所謂敦本之議也結又以為百姓非不知築隄固田之利然而不能者或因貧富同段而出力不齊或因公私相吝而因循不治非協力不可百姓所鳩工力有限必賴官中補助官中非因饑歉難以募民興役非因時不可

是年常州府築五瀉堰牐兼修牐裏隄岸

淳熙元年知常州府趙善防修奔牛牐

十三年知常州林寔重濬後河

十六年常州府濬東蠡河

紹熙五年知宜興縣高商老穿故瀆疏積水

是年知常州李嘉言濬烈塘河置牐

慶元元年知武進縣丁大聲濬後溪

嘉泰十二年知江陰軍邢燾濬九里河及城內外

渠



咸淳元年知常州史能之濬後河

元泰定元年濬常州路江陰州各通江河港

至順二年江陰州同知濬河自蔡涇北出江口長  
十里一百五步下牕以西長一千八百五十餘丈

明洪武三年常州府知府孫用重建烈塘牕

七年孫用濬澡子港置牕

二十年江陰縣濬申港

二十四年武進縣濬烈塘

二十五年武進縣疏剝銀河置牐無錫縣濬新河  
二十七年常州府濬孟瀆

二十八年武進縣鑿太平河江陰縣濬橫河

二十九年武進縣建孟河牐

三十年武進縣築蠡瀆河堰

永樂四年詔濬孟瀆

九年濬江陰青陽河道

宣德九年巡撫侍郎周忱建孟河牐

正統元年常州知府莫愚重建黃田牐附王直記

水之有牐所以時啓閉謹蓄洩通舟楫之去來資田疇之灌溉其為利大矣然惟仁民愛物之君子斯能因其利而利之不然則急情縱弛苟目前之安忽經久之利其為民病豈小哉予於黃田牐之重建而知其用心之厚也常州江陰城北黃田港引江潮貫城中而出於南門凡二十里會夏港之蔡涇以達於運河實舟楫走集之地附郭良田數千頃皆賴其灌溉港因潮之消長為淺深長則溢消則涸溢則舟通而足以溉田涸則田不得受利而舟膠且敗者有矣唐長慶中李德裕觀察浙西始建牐於城北潮長即啓以行舟消即閉以蓄水人賴其利歷歲滋久繕治不繼日就頽毀自洪武丙子以來人失利也久矣前之為郡縣者數十人莫有少繫於心者宣德中工部郎中桂林莫侯愚

被簡拔來為郡上賜璽書俾興利除害侯詢知其  
事歎曰此亦利害之大者也今田利漕舟皆賴此  
其可後乎然以始至不暇為久之政通民和即具  
奏其事上命巡撫侍郎周忱經度之周公廬陵人忠  
以奉國仁以惠民而侯與之協議重建於舊址南  
五丈許以避水之衝念役重費殷不忍賦於下公  
常廣儲蓄以備災度可支數十年欲稍發所備米  
市材僦工一切不以煩民計其費以聞詔可之乃  
命通判邵武張侯齡董其役然諸調度皆出周公  
買石洞庭山磨琢而後致之凡用石工五十人木  
工十人金工五人土工十人役夫二千五百人石  
四萬五千尺木二萬一千一百根磚三十萬一千  
箇石灰四十石鐵一萬一千觔食米二十九百石  
經始於正統元年八月而以其年十月成自是歲  
獲大穰舟行無害耕夫楫徒商人估客鼓舞而贊  
頌焉郡中父老皆大喜曰茲臈之建吾郡襟抱嚴

固風氣完復吾民其永有利哉

六年武進縣重修孟河牐

天順元年江陰縣知縣周斌興水利開通河港

四年濬江陰縣城濠

成化四年都御史邢克寬重建犇牛牐

附

王璵記

距毘陵城西三十里為犇牛堰沂堰水西行百八十里歷雲陽達京口為運河其地勢東傾堰不足以時蓄洩也嘗於京口呂城犇牛為三牐皆莫詳其初始按史記載丹徒水道自六朝千百年通吳會隋初有詔浚治則是此牐在齊梁前已有之矣自大業之後此閘當與河相為廢興而並不一書

至元符嘉泰始兩書修復我國初洪武己酉間牘  
廢後更導其支流東北出於堰為壩自是而運河  
不復通重載漕舟多出孟瀆河濟江而江行險遠  
歲不能無覆溺之患天順己卯冢宰崔公克讓為  
都御史巡撫江南為言於朝請復建牘營度適宜  
委畀得人曾無幾何而五牘告成其在常境者犇  
牛下牘是也成化戊子都御史邢公克寬來繼謂  
犇牛猶有上牘其遺址尚存盡亦修建俾互為啓  
閉遂以其事付之常守卓君天錫而以武進邑丞  
宋瑛董役事給費於公帑役民於農隙其經畫之  
良成功之速與下牘等夫自堰廢為牘牘廢為壩  
言水利者時有警病今牘與壩兩存之春夏水溢  
則由牘秋冬水涸則由壩壩可濬而牘無壅也根  
遺跡筭成算以開永圖夫豈樂因循而好自用者  
所能彷彿哉

八年知武進縣熊翀濬後河知無錫縣佟珍濬走馬塘

十九年知宜興縣知縣袁道濬便民河并觀鶴樓弘治四年伍性濬宜興縣湯溪等瀆

六年水利侍郎徐貫濬江陰縣申利桃花三港濬宜興縣葛溪等瀆

八年巡撫朱瑄濬宜興縣五賢等瀆復濬孟瀆等河

九年水利工部主事姚文灝濬宜興縣仕瀆等四瀆

十年姚文灝濬宜興縣白龍河

十一年濬宜興縣黃瀆等五瀆

十四年提督水利郎中臧林濬宜興縣港瀆

十五年江陰縣知縣徐貞修黃田牯

十七年臧林濬宜興縣後河并三瀆

正德六年提督浙直水利僉都御史俞諫濬江陰



縣河港

七年俞諫濬宜興縣河瀆浜港江陰知縣黃寔濬  
九曲河

嘉靖二年開常州府河瀆

四年濬常州府河港開牖

十五年江陰縣知縣徐貞濬利港桃花港

二十年宜興縣知縣馮訥鑿通澤河

二十三年濬江陰縣桃花港

二十四年巡按御史呂光洵督濬蘇松常鎮四府  
塘浦

是年江陰縣知縣趙錦建三關水牐

二十五年武進縣修烈塘牐

是年宜興縣知縣方逢時穿張公壩河

萬曆元年宜興縣知縣韓容濬荆溪

五年巡視下江水利御史林應訓疏孟瀆濬練湖

六年重修武進縣烈塘牐

是年濬宜興縣閃溪

八年常州府知府穆煒濬後河武進縣縣丞郭之

藩築芙蓉湖隄

詳見太湖

十六年濬蘇松常鎮四府河港塘瀆

三十七年無錫縣知縣許令典浚丹涇河

四十年巡撫應天都御史徐氏式濬江陰縣九里

河

四十三年江陰縣知縣金廷璧濬山塘河

四十六年常鎮兵備兼水利參政蕭丁泰濬江陰  
縣九里河

天啓二年武進縣知縣李維喬濬城濠無錫縣知  
縣劉五緯修築石塘

崇禎四年常鎮兵備兼水利參議吳麟瑞濬江陰  
縣九里河

六年常州府通判劉麟長濬無錫縣城內河  
是年常州府知府洪周祿濬江陰縣九里河

提督學政甘學潤常鎮兵備兼水利副使徐世蔭  
濬江陰縣城內河

國朝康熙二十年巡撫慕天顏奏請濬常熟縣白茅港  
武進孟河奉

旨准行

四十六年冬奉

聖祖仁皇帝發帑銀三萬餘兩修建孟河北牯魏村牯及  
奔牛之天井牯

雍正五年奉

旨發帑銀二萬餘兩疏濬孟瀆河得勝新河猶恐江潮汎湧泥沙淀積又發帑銀三百二兩零建造犁船四隻并領混江龍四具召募水手每歲春秋二季於江口拖刷淤墊泥沙

鎮江府

晉太興四年晉陵內史張闓立曲阿新豐塘灌田八百頃陳敏鑿練湖

南北朝齊建武中曲阿令丘仲孚鑿長岡埭

梁天監九年造謝塘

唐永泰中轉運使劉晏刺史韋損重開丹陽之練湖

作斗門以通灌溉

附

李華練湖頌序

大蜡之祭辭曰土反其宅

水歸其壑先王因下流而導之故曰九川滌源因  
迤匯而潴之故曰九澤既陂以疏天地之氣以利  
元元之用崇伯汨五行而殛羽山臺駘障大澤而  
封汾川洪範首之春秋載之地有廣狹事無古今  
大江鉅區惟潤州其藪曰練湖幅員四十里菰蒲  
菱芡之多龜魚螺鱉之產饗飲江淮膏潤數州其  
旁大族强家泄流為田專利致富自丹陽延陵金  
壇環地三百里數合五萬室旱則懸耜水則具舟

人罹其害九十餘祀凡經上司紛紜與奪八十一  
斷嗚呼曲能掩直強可吞弱老幼怨痛沈聲無告  
永泰元年詔公卿選賢良先除二千石以江南經  
用所資首任能者是歲十月二十三日拜前常州  
刺史京兆韋公損為潤州聲如颶馳先詔而至吏  
人畏服男女相賀即日上無貪刻下無冤憤公素  
知截湖為壤災甚螟蟲臨事風生指期以復羣謗  
雷動公恬然獨裁乃白本道觀察使兼御史中丞  
韋公元甫中丞撫掌恆心如公之謀且曰興利除  
害得其人而後行非常之政敢歸叔父公乃申戒  
縣吏率徒闢之人不俟召呼忤從役畚鍤蓋野濬  
臯成蹊增理故塘繚而合之廣湖為八十里像月  
之規鑄金之固水復其所如鯨鯢射洶洶隱地雷  
聞泉中先程三日若海之彌望瀨瀨如吞吐日月  
沉沉如韞畜風雨所潤者遠原隰皆春耕者飽憂  
者泰於是疏為斗門既殺其溢又支其澤沃瘠均



品河渠通流商悅莫價人勇輸賦遐邇受利豈惟  
此州每歲萌陰乘陽二氣相薄大雨時行羣潦奔  
流水勢所入盈而無傷龍見方雲稼蒙其渥時前  
相國彭城劉公晏統東方諸侯平其貢稅聞而悅  
之白三事以聞詔書褒異焉彭城公宣命至江南  
捧詔授公公率元僚掾史令丞已下至於耆艾西  
向拜手忻戴皇朝人心上感天降膏澤如有神祇  
昭協厥志公正直而和專靜而斷嫉惡宥過惠良  
察姦純鈞精堅百鍊不耗伐冰之貴降從士禮詩  
云靖共爾位好是正直宜其享福也吏人入賀公  
拱而謝之曰尚書劉公觀察韋公奉行王澤也鄙  
何力之有焉丹陽令杜孟寅秉公之清白延陵令  
李令從如公之愛人金壇令胡圯秉公之成規及  
丹陽耆壽周孝環百姓湧源等拜首而請曰兄為  
澤兄說也水歸於澤而澤說於人百年沒塞而公  
啓之臣哉鄰哉克諧帝休永代是式三縣無災若

不碣而刻之王命不揚於厥後後之人無以倚負也華嘗學古見訪為頌頌曰望云云兮視冥冥焉聞魚樂葭莢生膏腴利倍起訟爭斯人怨抑痛無聲韋公正直動神靈百年游淀為溇清飢者食兮病者寧詔書光寵恩霈榮劃然既瞻復眩明追琢刻頌揚芬馨

武德二年刺史謝元超復置南北謝塘以溉田

五代南唐昇元元年知丹陽縣呂延正濬練湖附呂

延正濬治練湖狀

當縣有練湖源出潤州高麗長山下注官河一百二十里臣考

之碑志訪諸鄉老當為湖日湖水放一寸河水漲一尺旱可引灌溉潦不致奔衝其利田幾逾萬頃昔環湖而居衣食於漁者凡數百家有斗門四所由前唐季湖廢近湖人戶耕湖為田後農家失恃

漁樵失業民復思湖以禦災而無所實力臣頻承  
條制修葺陂塘竊度其湖為利甚溥遂聚財役工  
於斗門基上以土堰堰捺及填補破缺處初謗議  
震動謂臣不良圖且廢湖豐己者不十餘家有湖  
無災者四縣之地臣明知利害獨如弗聞自今秋  
後不雨河道乾枯累放湖水灌注使商旅舟楫往  
來免役牛牽當縣及鄰縣人戶請水救田臣並掘  
去湖岸給水如將久遠須置斗門方得通濟其斗  
門木板植須用楠木乞給省  
場木板木起建下所司處分

宋紹聖二年詔武進丹陽丹徒三縣修沿河隄岸溝

碇

互見常  
州府

知丹陽縣蘇京重濬練湖

元符元年正月知潤州王愈建言呂城牐常宜車  
水入澳灌注牐身以濟舟若舟沓至而力不給許  
量差牽駕兵卒併力為之監官任滿水無走泄者  
賞水未應而輒開牐者罰守貳令伍常覺察之詔  
可

崇寧四年臣僚言有司以練湖賜茅山道觀緣潤  
州田多高仰及運渠夾岡小淺易涸賴湖以濟請  
別以沙田賜之仍令常平官考求前人規畫修築

從之

宣和五年詔漕臣補葺練湖隄岸宋史河渠志臣僚言鎮江府練湖與新豐塘地理相接八百餘頃灌溉四縣民田今堤岸損缺不能貯水乞候農隙次第補葺詔本路漕臣并本州縣官詳度利害檢工料以聞

紹興七年兩浙轉運使向子諲增置練湖斗門石礮宋史河渠志向子諲言鎮江府呂城夾岡形勢

高仰因春夏不雨官漕艱勤尋遣官屬李澗詢究  
練湖本末始知此湖在唐永泰間已廢而復興今  
隄岸弛禁致有侵佃冒決故湖水不能瀦蓄舟楫  
不通公私告病若夏秋霖潦則丹陽金壇延陵一  
帶良田亦被淹沒臣已令丹陽知縣朱穆等增置  
二斗門一石碶及修隄防盡復舊跡庶為永久之  
利

知丹陽縣郭京濬練湖

乾道六年知鎮江府蔡洸濬河

七年詔漕臣沈度修築練湖隄岸宋史河渠志臣僚言丹陽練湖幅員四十里納長山諸水漕渠資之故古語云湖水寸渠水尺在唐之禁甚嚴盜決者罪比殺人本朝寢緩其禁以惠民然修築嚴甚春夏多雨之際瀦蓄盈滿雖秋無雨漕渠或淺但泄湖水一寸則為河一尺矣後堤岸圯闕不能貯水彊家因而專利耕以為田遂致淤澱歲月既久

其害滋廣望責長吏濬治堙塞立為盜決侵耕之法著於令庶幾練湖漸復其舊民田獲灌溉之利漕渠無淺涸之患詔兩浙漕臣沈度專一措置脩築

八年知鎮江府宋貺濬河

淳熙二年知鎮江府陳居仁置黃水碓

十六年總領錢良臣修丹陽練湖橫壩及諸斗門

碓函



紹熙間丹陽縣開丁義瀆

慶元四年知鎮江府萬鍾濬導市河

嘉定元年丹徒縣主簿馬榮祖修築練湖隄岸

淳祐二年知鎮江府柯元壽修練湖牆

景定三年知丹陽縣趙必棣修築練湖岸埭

咸淳六年知鎮江府趙潛改築程公上下二壩

元至元十三年金壇縣作南壩

三十一年詔丹陽縣濬練湖

大德九年行都水監濬練湖

泰定三年疏漕渠修濬練湖元史河渠志練湖在鎮江元有江南之後豪勢之家於湖中築堤圍田耕種侵占既廣不足受水遂致泛溢世祖季年參政安達拉奏請依宋例委人提調疏治其侵占者驗畝加賦至治三年十二月省臣奏請役夫三十餘人濬滌練湖九十日可完人日支糧三升中統鈔一兩行省行臺分官監督所用船物今歲預備

來春興工合行事宜依江浙行省所擬既得旨都  
省移文江浙行省委參政董中奉率合屬正官親  
臨督役於是董中奉言所委前都水少監崇明州  
知州任奉政鎮江路總管毛中議等議先開運河  
工畢就濬練湖省準所言各監工官言已分運河  
作三壩依元料深闊丈尺開濬至三月四日畢工  
又監修練湖官言任奉議指畫元料增築隄堰及  
舊有土基共增闊一丈二尺平面至高低灘脚增

築共量斜高二丈五尺依中堰西石碓東舊堤臥  
羊灘修築如舊堤高闊已及所料之上者遇有頽  
缺修築令完中堰西石碓五百婆隄西上增高土  
一尺有缺亦補之五百婆隄至馬林橋隄水勢稍  
緩不須修治其隄底間有滲漏者窒塞之三月六  
日破土九日入役至十一日工畢實役三日又鎮  
江路言練湖今已開濬若不設法關防徒勞民力  
應關本路達嚕噶齊烏魯斯哈雅總治其事同知

哈克繖知事程郇專管啓閉斗門行省從之

明建文元年鎮江府知府劉辰丹陽縣知縣董復重

濬練湖

宣德六年巡撫侍郎周忱修五堰

正統六年丹陽縣知縣陳誼築練湖隄及修斗門

景泰二年修練湖

六年巡撫應天都御史鄒來學濬簡瀆

成化二年丹陽縣知縣蔡實築練湖隄置斗門函

管

弘治十二年濬丹徒縣甘露港

十三年丹陽縣知縣高謙修築練湖隄岸

正德三年鎮江府作博望新牕

嘉靖二十四年呂光洵督濬蘇松常鎮四府塘浦

三十四年丹陽縣知縣陳奎置水關石牕

隆慶二年鎮江府同知馬豸濬馬嘶港

三年修練湖隄岸

六年修濬蘇松常鎮四府堰壩田圍

互見蘇松常三府

金壇縣知縣劉美鑒長新埤渠建義成廣澤二牖

十六年濬蘇松常鎮四府河港塘瀆

互見蘇松常三府

十八年升陽縣知縣周應鰲開境內支河

三十六年濬丹陽縣鄭涇河

康熙四十七年巡撫于準修復練湖

江南通志卷六十四